

MAHTE é Gabú Danglù Laiká (The Gospel of Matthew)

Yesuq É Byùxik Shap Kyô É Hkyô

Luk 3:23-38

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaû gi, a-ô mâ é eq rajung za nghut lhê.

² Abraham gi, Isak lé hkû;
Isak gi, Yakup lé hkû;
Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;
Hesrun gi, Ram lé hkû;

⁴ Ram gi, Aminada lé hkû;
Aminada gi, Nashon lé hkû;
Nashon gi, Salamun lé hkû;

⁵ Salamun gi, Buaq lé hkû;
Buaq é yhângnu gi, Rahap nghut ri.
Buaq gi, Obet lé hkû;
Obet é yhângnu gi, Ruhtaq nghut ri.
Obet gi, Yese lé hkû;

⁶ Yese gi, Hkohkâm Dawiq lé hkû;
Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

7 Sholumon gi, Rehoboam lé hkû;
 Rehoboam gi, Abiyag lé hkû;
 Abiyag gi, Asa lé hkû;

8 Asa gi, Yehoshaphat lé hkû;
 Yehoshaphat gi, Yoram lé hkû;
 Yoram gi, Uzi-aq lé hkû;

9 Uzi-aq gi, Yohtam lé hkû;
 Yohtam gi, Ahaza lé hkû;
 Ahaza gi, Hezekiaq lé hkû;

10 Hezekiaq gi, Manase lé hkû;
 Manase gi, Amon lé hkû;
 Amon gi, Yosiaq lé hkû;

11 Yosiaq gi, Babelon má shúm dut huî é hkûn,
 Yehkoniaq eq yhanggu yhangmâng pé lé
 hku é nghut ri.

12 Babelon má shúm dut huî é htâng má,
 Yehkoniaq gi, Shalahtila lé hkû;
 Shalahtila gi, Zerubabelaq lé hkû;

13 Zerubabelaq gi, Abiut lé hkû;
 Abiut gi, Eliakim lé hkû;
 Eliakim gi, Azor lé hkû;

14 Azor gi, Zaduk lé hkû;
 Zaduk gi, Ahkim lé hkû;
 Ahkim gi, Eliut lé hkû;

15 Eliut gi, Eliaza lé hkû;
 Eliaza gi, Mahtan lé hkû;
 Mahtan gi, Yakup lé hkû;

16 Yakup gi, Mariq é yhanglâng Yosep lé hku é
 nghut ri;
 Mariq gi, Hkrisduq gâ é Yesuq lé hku é sù
 nghut ri.

17 Haû mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô

Luk 2:1-7

18 Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep èq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogûng dut bê nghut ri.

19 Yhâng é yhumsîng hpó Yosep gi, dingmán sù nghut luí, yhang lé byu pê hí má hoq a kâm lhoq hpu nau é yanmai, tsík za lhoq kâng pyám râ dâ ri.

20 Nghut kôlhang, yhang haû su myit nyi é hkûn, yhupmoq má, haû Yhumsing é maumang lagyo gi, yhang lé, lé htoq shit luí, "Dawiq é yhangzo yhangshu Yosep ê, haû náng é yhumsîng myhí Mariq lé hâng yù râ hkyô lé, hkâ-myt chiq; haî mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê.

21 Yhang gi, yuqzo rayuq hkû râ nghut luí, nàng gi, zoshâng haú lé, Yesuq nghû myìng myhíng byi ra râ nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga taí ri.

22 Shí hkyô banshoq gi, Garai Gasâng èq, haû myiqhtoi dông taí é dang lé lhoq dik é nghut ri.

† 1:17 Grik dong *Hkrisduq* gâ é gi, xù but hui Sù gâ é lichyúm nghut mù, Hebre dong *Mesaia* gâ é eq rajung za nghut lhê.

²³ Myiqhtoi dang haû gi, "Haû zomyi gyíng gi, zogûng dut luí, yuqzo rayuq hkû râ nghut lhê; Yhâng é myìng lé gi, Emanuelaq ga kó râ nghut lhê." ✧ gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

²⁴ Yosep gi, yhup bûn lo é hkûn, haû Yhumsing é maumang lagyo taí é eq rajung za, Mariq lé, yhangmyi dông yhúm má shuí yù bê nghut ri.

²⁵ Nghut kôlhâng, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haú lé, yhang gi, Yesuq ga myhíng byí ri.

2

Buihtoq Hkyam Mã É Hpaqchyî Bò Bang

¹ Herut hkohkâm up nyi é u lé, Yuda mau mã é Betlehem wà má Yesuq lé hku é nghut ri. Hau htâng, buihtoq hkyam mã é hpaqchyî bò bang gi, Yerusalem wà mó má jé lé kômù,

² "Haû hku lé lô bê Yudaq byu pê é Hkohkâm gi, hkâmá nghut lhê lhú? Yhâng é kyí lé, buihtoq hkyam má ngamoq myàng luí, Yhang lé noq râ matú jé lé é nghut lhê." ga luí, myí akô nghut ri.

³ Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wà mó mã é lhunglhâng bang le, myit myô bum akô nghut ri.

⁴ Haû mù luí, yhang gi, byu pê é hkyangjong agyi pé eq tarâ sará pé banshoq lé, ji tsíng yù mù, haû Hkrisduq hkâmá hku lé lô râ nghut é hkyô lé myí ri.

✧ **1:23** Esai 7:14

⁵ Haú hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luî, haú myiqhtoi kê tô é má,

⁶ Yudaq mau mâ é Betlehem wà ê, nàng gi, Yudaq mau mâ é wà pé má, je tiq sù a nghut; hkâsu mù gâ le, ngá é Israelaq byu pé lé upzúng râ Zau gi, náng chyáng mai htoq lô râ nghut lhê.*

ga bo tô ri." ga tû taí akô.

⁷ Hau htâng, Herut gi, haú hpaqchyî bò bang lé haq ji yù mù, kyî lé htoq shit é ahkyíng lé, yhangmoq chyáng mai hkyak wó myî sê yù bê nghut ri.

⁸ Haú mù, yhang gi, "Nungmoq, zoshâng haú lé rago ê ho wú keq. Ngò le, Yhang lé ê wó noq râ matú, Yhang lé nungmoq ê myâng eq yhang, ngo lé lo shit kyo keq." ga taí luî, haú bang lé Betlehem wà shut nhang kat bê nghut ri.

⁹ Yhangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihtoq hkyam má yhangmoq myang é kyî gi, haú zonú nyi é ahtoq ang ang má ló nô é jé shoq, yhangmoq é hí má e ló byí ri.

¹⁰ Yhangmoq gi, kyî haú lé myàng jáng, gyai yhang gabú bum akô nghut ri.

¹¹ Yhangmoq gi, haú yhûm má wang e ló kô é hkûn, zonú eq yhângnu Mariq lé myàng kômù, hkyihput htuoq luî, haú zonú lé noqkuq akô; hau htâng, yhangmoq é sutdek pé lé le hpóng luî, hîng, namngón jung loban eq mura* pé lé yù mù, Yhang lé chyunghuq byí akô nghut ri.

☆ **2:6** Mihka 5:2 * **2:11** Mura gi, chi wó kut jung xù nghut lhê.

¹² Yhangmoq gi, Herut chyáng a dum taû ló râ matú, yhupmoq má, yhangmoq lé sidiq byî é hui kômù, hkyô gó hkat dông yhangmoq é mau shut taû ló bekô nghut ri.

Egutuq Ming Shut H pang E É Hkyô

¹³ Yhangmoq ló byuq é htâng má, haû Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haû zoshâng eq yhângnu lé, Egutuq ming shut shuî hpang ê aq. Ngò, nang lé dum ji yu é ahkyíng jé shoq, haú má nyi nyi keq. Haî mù gâ le, Herut gi, zoshâng haú lé sat râ matú, ho nyi bê nghut ri." ga taî ri.

¹⁴ Haû mù, yhang gi, toq luî, myín lé yhang, zôshang me lé shuî chûng mù, Egutuq ming shut e ló bê nghut ri.

¹⁵ Yhangmoq gi, Herut shi é jé shoq, haú má nyi nyi akô. Haû gi, "Ngá zo lé, ngò, Egutuq ming mai wut htoq yû bê nghut lhê."✧ ga, haû Yhumsing eq myiqhtoi dông taî é dang lé lhoq dik é ru nghut lhê.

¹⁶ Herut gi, yhang lé, hpaqchyî bò bâng eq mhaû pyâm tô é lé sé jáng, nhikmo-yo bê nghut ri; haû mù, yhang gi, haû hpaqchyî bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayâm mâ é wà pé má nyi é, í zân mai a-ô mâ é yuqzo pé banshoq lé, sat pyám nhang ri.

¹⁷ Haû gi,
"Ramaq gâ é jowò má, yón kuq é eq ngau garû é htê lé wó gyô ri;
Rahkelaq gi, yhang zô pé a nyi byuq lo kô é yan-mai, ngau nyi é eq nhik a wó títg dut ri."✧
ga luî,

✧ 2:15 Hos 11:1 ✧ 2:17 Yer 31:15

18 myiqhtoi Yeremiaq dông taî tô é dang lé lhoq dik é nghut ri.

Nazaret Wà Má Dum Taû Lo É Hkyô

19 Herut shi byuq é htâng, Egotuq ming má, haû Yhumsing é maumang lagyo gi, Yosep chyáng yhupmoq dông lé htoq shit mù,

20 "Toq aq, haû zôshang me lé shuí chûng mù, Israelaq ming má taû lô aq; hkâsu mù gâ le, haû zoshâng lé sat naû bang shi byuq bekô nghut ri." ga taî ri.

21 Haû mù, Yosep gi, zôshang me lé shuí chûng mù, Israelaq ming shut taû lô bê nghut ri.

22 Nghut kôlhang, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jâng, haú má a wám lô lo nghut ri. Yhupmoq má sidiq byî é huî é eq rajung za, yhang gi, Galile mau shut e lô mù,

23 Nazaret gâ é wà má lô nyi nyi bê nghut ri. Haû mù, "Yhang lé, Nazaret wà byù ga râ nghut lhê." ga luî, haû myiqhtoi pé dông taî tô é dang lé lhoq dik é nghut ri.

3

Wui-myhup Sará Yohan Shui Hen É Hkyô

Mrk 1:1-8; Luk 3:1-18; Yhn 1:19-28

1 Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi,

2 "Myit lhîng keq; hkâsu mù gâ le, mauhkûng mingdán gi, chyâng lò bê* nghut ri." gâ ri.

* **3:2** *Mauhkûng mingdán gi, chyâng lò bê gâ é lichyúm gi, Garai up râ ahkyíng chyâng lò bê gâ é nghut lhê.*

³ Haú yuq gi,
 "Haú yoso má, byù rayuq garú taí é htê gi,
 'Haú Yhumsing é matú, hkyô hen to keq; Yhâng é
 matú, hkyô lhoq nyhang to keq.' gâ ri."✧
 ga myiqhtoi Esai-aq taí tô é sú yuq nghut ri.

⁴ Yohan gi, gola-uq shomaú èq saí é mebu wut
 mù, yhâng é hpyidum má gi, shokuq hpyihit hit ri.
 Yhâng é zoshuq gi, dinggám eq yosô byo-î pé nghut
 ri.

⁵ Yerusalem wà mó mâ é bang, Yuda mau
 banshoq mâ é bang eq Yodan làng awui ayàm
 lhunglhang mâ é bang gi, yhâng chyáng htoq e bum
 akô.

⁶ Yhangmoq gi, yhumsing é mara lé yín yû kôluí,
 yhâng chyáng mai Yodan làng má wui-myhup
 hkâm yu bum akô nghut ri.

⁷ Nghut kôlhang, yhang gi, yhang wui-myhup
 hkám byí é jang má, Hparishe pé eq Saduke pé myo
 myo lé lo nyi kô é lé myàng jáng, yhangmoq lé taí é
 gi, "Duq htân lhangmuì amyú pé ê, jé lô râ yubak
 dam mai wó hfang lut kó sháng gaq ga, nungmoq
 lé ó yuq taí pûn é lhú?

⁸ Myit lhang hkyô eq gingdán é ashi pé zui keq.

⁹ 'Ngamoq gi, Abraham é yhangzo yhangshû pé
 nghut lhê.' nghû luí, yhumsing é i-myit unghkaú
 má hkâlum to kó. Hkâsu mù gâ le, ngò, nungmoq
 lé taí kyo kôlé, Garai Gasang gi, luqgok shí pé mai,
 Abraham é matú yhangzô pé wó hpan htoq kat
 lhê.

¹⁰ Ahkuí lhang, Garai Gasang gi, Yhâng é wazung
 lé haú siggâm wang pé má tô to bê nghut ri; haú

✧ 3:3 Esai 40:3

mù, ge é ashi a zuí é agàm hkangmó lé gi, htug lhêng pyám mù, myi má dú kat pyám rà nghut lhê.

¹¹ Ngò gi, nungmoq myit lhing kó sháng gaq nghû, wui èq za wui-myhup hkám byi lhê. Nghut kôlhang, ngá htoq má wum-o a-tsam je bo é sù rayuq, ngá htàng má jé lé lô shirâ nghut luí, ngò gi, Yhâng é hkyî-tsung chûng byi rà lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi rà nghut lhê.

¹² Yhang gi, loq má byò chung to mù, guq chyarâng má é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám rà nghut lhê." gâ ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³ Haú hkûn, Yesuq gi, Yohan chyáng wui-myhup hkâm yù rà ga, Galile mau mai Yodan làng má jé lé lo ri.

¹⁴ Nghut kôlhang, Yohan gi, "Ngò sheq Náng chyáng wui-myhup hkâm yù rà sù ru nghut lhê nhing! Nàng sheq ngá chyáng lé lo lhê lú?" ga luí, lhom taí hkûm ri.

¹⁵ Haú hkûn, Yesuq gi, "Dingmán hkyô banshoq lé, nga-nhúng lhoq dik rà é yanmai, Ngo lé wui-myhup hkám byi laq." ga tû taí ri. Haú mù, Yohan le, gyo byi bê nghut ri.

¹⁶ Yesuq gi, wui-myhup hkâm yù eq yhang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri.

¹⁷ Haú hkûn, "Shí yuq gi, Ngò chyitdap é Ngá zo nghut lê; Yhâng é ahtoq má Ngò gabú myit ngón nyi lê." ga mauhkûng mai danghtê htoq lo ri.

4

Yesuq, Gúnglaú Huí É Hkyô

Mrk 1:12-13; Luk 4:1-13

¹ Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuí ê ri.

² Yesuq gi, zoshuq gám é myi xê nyí myi xê myìn jé jáng, zòmút hui bê nghut ri.

³ Haú hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga tâ ri.

⁴ Haú jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mungdang hkangmó èq sheq asak duì râ nghut lê. ☆ ga luí, Chyúmdang má kê tô ri." ga yhang lé tû tâ ri.

⁵ Haú hkûn, nat Tsadán gi, Yesuq lé, chyoiyúng myuq* má shuí ê mù, noqkuq yhum je myhang é shúhtâng htoq má yap nhang to luí,

⁶ "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le, 'Náng é matú, Garai Gasang gi, Yhâng é maumang lagyô pé lé tâ to râ nghut mù, luqgok má Náng é hkyí a ló htung shoq, yhangmoq é loq èq Nang lé lhom bún yú kó râ nghut lê.' ☆

☆ **4:4** Tarâ Pun 8:3 * **4:5** chyoiyúng myuq gi, Yerusalem lé gâ lê.

☆ **4:6** Hkya-on 91:11-12

ga luî, Chyúmdang má kê tô ri." ga taî ri.

⁷ Nghut kôlhang, Yesuq gi, "'Haû Yhumsîng, nungmoq é Garai Gasang lé, wó chyam wú râ a nghut.'[☆] ga luî le, Chyúmdang má kê tô ri." ga, yhang lé tû taî ri.

⁸ Nat Tsadán gi, Yesuq lé, gyai yhang myhang é bùm htoq má shuî doq ló mù, mingkan má joq é mingdán pé banshoq eq haú pé é hkikhkâm hkyô lé tûn shî ri.

⁹ Hau htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taî ri.

¹⁰ Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haû Yhumsîng nàng é Garai Gasang lé za, nàng noqkuq dojaú ra râ nghut lhê.'[☆] ga luî, Chyúmdang má kê tô ri." ga, yhang lé taî ri.

¹¹ Haû mù, nat Tsadán gi, ló byuq bê nghut luî, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Lô É Hkyô

Mrk 1:14-15; Luk 4:14-15

¹² Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taû ló bê nghut ri.

¹³ Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kapernaum wà má ló nyi nyi ri.

¹⁴ Haû gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau mâ é hkyô, Yodan làng yàm, tûngbaù pé nyi é Galile mau ê,

[☆] **4:7** Tarâ Pun 6:16 [☆] **4:10** Tarâ Pun 6:13

16 mauchut hkaû má nyi nyi é bang, maubó mó lé myàng bê nghut ri; shî wup hkaû má nyi to bâng é matú, maubó lô bê nghut ri."☆

ga kê tô é dang lé lhoq dik râ matú nghut ri.

17 Haú hkûn mai, Yesuq gi, "Myit lhîng keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

Yesuq É Chángzo Hí Dut Bang

18 Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri.

19 Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lê." ga taí ri.

20 Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

21 Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaí hkaû má gùn hpo nyi akô. Yhangnhik lé, Yesuq wut kat jáng,

22 yhangnhik gi, radá dâm, yhangnhik é yhângwa eq lhaí haú lé, tô pyâm to kôluí Yesuq htâng cháng bekô nghut ri.

Nò Bang Lé, Yesuq Lhoq Gê Byí É Hkyô Luk 6:17-19

☆ 4:16 Esai 9:1-2

²³ Yesuq gi, Galile mau ramau gón má htoq ê mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pé chyáng mâ é nõhpyo ajung jung hui bang eq noli nojàng amyû myû dap bang lé, lhoq gê byî wún ri.

²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nõhpyo ajung jung huí é bang, hkê-nhô jamjaû nyi é bang, nat gang wang júng é bang, mhûngtuq tuq é bang, gùngjum shi é bang lé, shuî lé lô kôluí, Yhang gi, haú bang lé lhoq gê byî ri.

²⁵ Galile mau, Dekapoli,† Yerusalem, Yuda mau eq, Yodan làng tû tap mâ é byù moq mó gi, Yesuq htâng châng bum akô nghut ri.

5

Hkungsô Wó É Tarâ

Luk 6:20-23

¹ Yesuq gi, byù moq mó lé myàng jáng, bùm má doq ló luí, ló zung tô ri. Haú hkûn, Yhâng é chángzô pé gi, Yhâng chyáng lé lô kôjáng,

² Yhang nhut hkum hpóng luí, yhangmoq lé mhoqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é mingdán nghut nyi ri.

⁴ Myit iyon huí é bang gi, hkungsô wó nyi ri; hkâsu mù gâ le, yhangmoq gi, nhik lhoq tîng é hui kó rá nghut lhê.

† 4:25 Dekapoli gâ é gi, Grik đông myuq raxê lé gâ lhê.

- ⁵ I-myt nú-nhâm é bang gi, hkungsô wó nyi ri; hkâsu mù gâ le, yhangmoq gi, mingkan lé wó sîng kó râ nghut lhê.
- ⁶ Dingmán hkyô lé mut shit nyi é bang gi, hkungsô wó nyi ri; hkâsu mù gâ le, yhangmoq gi, nhik dik shoq myàng zo kó râ nghut lhê.
- ⁷ Shogyo nhikmyin myit bo é bang gi, hkungsô wó nyi ri; hkâsu mù gâ le, yhangmoq gi, shogyo nhikmyîn yu é hui kó râ nghut lhê.
- ⁸ Myit sansêng é bang gi, hkungsô wó nyi ri; hkâsu mù gâ le, yhangmoq gi, Garai Gasang lé myàng kó râ nghut lhê.
- ⁹ Nguingón hkyô sô xoq byî é bang gi, hkungsô wó nyi ri; hkâsu mù gâ le, yhangmoq gi, Garai Gasâng é yhangzô pé gâ é hui kó râ nghut lhê.
- ¹⁰ Dingmán hkyo é yanmai zing-rî huî é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é nghut nyi ri.
- ¹¹ Ngá é yanmai, byu pê èq, nungmoq lé rhoi é, zing-rî é, a teng a mán é dông agè ashop é dang amyú myû taí tso kô é hkûn, nungmoq hkungsô wó nyi ri.
- ¹² Nguingón gabú nyî keq, hkâsu mù gâ le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqh-toî pé lé le, yhangmoq gi, haú dông zing-rî laî lo wú bekô nghut ri.

Xo Eq Maubó

Mrk 9:50; Luk 14:34-35

13 Nungmoq gi, myidàm htoq mâ é xo nghut nyi lhê. Nghut kôlhang, xo gi, màn kê byuq jâng, haú lé hai èq dum wó lhoq ngam yù râ lú? Shinggan shut dú pyám mù, byu pé èq nâng pyeq pyám é mai lai luí, hai akyû le bò râ a nghut lo.

14 Nungmoq gi, mingkân é maubó nghut akô; bùm htoq mâ é myuq lé gi, wó nghop to râ a nghut.

15 Myibung lé tap mù, mûng èq nghop tô é ó a kut wú kó; haú su kut râ malaí, yhúmhaú má lúng tô é bang yuq hkgámó myoq wó myâng râ matú, tsungjang má kúm tsung to râ nghut lhê.

16 Haú eq rajung za, byu pé gi, nungmoq é ge é muzó pé lé byu-myàng luí, mauhkûng htoq mâ é nungmoq é Îwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

17 Ngò gi, myiqhtoí pé é dang eq jep é tarâ lé lhoq hpyoq pyám râ matú, jé lé é nghut nhô hkâ-ngâm kó; haú pé lé lhoq dik râ matú sheq jé lé é ru nghut lhê.

18 Ngò, nungmoq lé teng za tái kôlé, mauhkûng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhum lhang byuq byuq râ a nghut.

19 Jep é tarâ shí pé mâ é tiq dik é dang rahkun lé lu lai luí, góbang lé le, haú su kut râ matú mhoq byí é sù ó yuq nghut kôle, mauhkûng mingdán má tiq dik sù gâ é hui râ nghut lhê; nghut kôlhang, jep é tarâ shí pé lé châng kut luí, mhoq byi sù kúm gi, mauhkûng mingdán má, hkik sù gâ é hui râ nghut lhê.

20 Ngò, nungmoq lé taí kôlé, nungmoq dingmán é hkyô má, haû Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó râ a nghut.

Byù Hkâsat

21 'Byù hkâsat, ☆ sat é sù gi, jéyáng é hui râ nghut lhê' ga, hí hpyang lhê é bang lé taí tô é dang, nungmoq wó gyô wú bê nghut lhê.

22 Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang'* ga taí é sù gi, Yudaq byìn tú wapdoq má jéyáng é hui râ nghut lhê; 'Byù bam ê' ga wut é sù gi, ngaraí myi eq gingdán nyi ri.

23 Haû mù, hkungga gyap má, nàng hkungga nhông râ dâ é hkûn, náng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng,

24 náng é hkungga lé, haû hkungga gyap hí má tô pyâm to mù, náng é gumang hpó haú yuq eq hí nguingón hkyô ló yû luî sheq, hkungga lé nhông byi aq.

25 Nang lé yui tsuq sù gi, nang lé tarâ rûng má dé e ló é hkûn, hkyô má ru nghut nyi ashî u lé, yhang eq nguingón hkyô hí hân yù aq. Haû a nghut jáng, haú yuq gi, nang lé, tarâ agyi chyáng ê ap pyám mù, haû tarâ agyi gi, nang lé htóng hkyô pyám râ matú, htóng suwún hpô é loq má ap pyám râ nghut lhê.

☆ 5:21 Htoq Ló 20:13 * 5:22 *Byù gang* gâ é lé, Grik đông "Raka" gâ lhê.

26 Ngò, nang lé teng za tái lé, yuichyîn haû a ban xap xap gi, htóng haú mai nàng wó htoq ló râ a nghut.

Su-myi Sulàng Lú É Hkyô Eq Séng Luî Mhoqshit É Dang

27 'Su-myi sulàng hkâlú¹☆ gâ é dang lé, nungmoq wó gyo wú bê nghut lhê.

28 Nghut kôle, Ngò, nungmoq lé tái kôlé, myiwe rayuq lé shut nau é myit èq wú é sù gi, yhâng é myit hkaû má, myiwe haú yuq eq su-myi sulàng lú hkyô kut é sù nghut bê.

29 Haû mù, náng é loqyo myoq èq, nang lé mara kut shut nhang é nghut le gi, haú lé lap choq yû mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

30 Haû eq rajung za, náng é loqyo loq èq, nang lé mara kut shut nhang é nghut le gi, haú lé hpyit yû mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luî Mhoqshit É Hkyô

Mht 19:9; Mrk 10:11-12; Luk 16:18

31 'Yhumsing é yhangmyi lé kâng é sù gi, lhoq kang laiká byi râ dut lhê.¹☆ gâ é dang joq lhê.

32 Nghut kôlhang, Ngò, nungmoq lé tái kôlé, myiwe đông mai làng shut é a nghut é za, yhumsing

☆ 5:27 Htoq Ló 20:14 ☆ 5:31 Tarâ Pun 24:1

é yhangmyi lé kâng é sù gi, myiwe haú lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, sumyi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmû; Yhumsing lé byî tô é danggidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê.

³⁴ Nghut kôlhang, Ngò, nungmoq lé taí kôlé, hai èq le hkâdakâm kó: mauhkung lé lang luí le, hkâdakâm kó; hkâsu mù gâ le, haú gi, Garai Gasâng é zùng tanghkuq nghut lhê;

³⁵ myigùng lé lang luí le, hkâdakâm kó; hkâsu mù gâ le, haú gi, Garai é hkyî nang jang nghut lhê; Yerusalem lé lang luí le, hkâdakâm kó; hkâsu mù gâ le, haú gi, Hkohkâm mó é myuq nghut lhê.

³⁶ Hau htoq agó, yhumsing é ulhùm èq le, hkâdakâm kó; hkâsu mù gâ le, xâm rahkat lé lhang hpyû shoq noq shoq, nàng wó kut é a nghut.

³⁷ Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haú mai lai é gi, haú agè ashop su chyáng mâ é nghut ri.

Lató Hpuq É Hkyô

Luk 6:29-30

³⁸ 'Myoqjí matú myoqjí xap, zui matú zui xap'✧ gâ é dang lé, nungmoq wó gyô wú bê nghut lhê.

³⁹ Nghut kôlhang, Ngò, nungmoq lé taí kôlé, agè ashop kut é sù lé lató hkâhpuq. Náng é loqyo

✧ 5:38 Htoq Ló 21:24

bowâm má pyuq byi sù lé, loqpaî hkyam le hkâm byi shi aq.

⁴⁰ Byù rayuq yuq, nang lé mara tsuq mù, náng é buzo lé yu pyám byî é nghut jáng, bumó lé le, hkyut byi shi aq.

⁴¹ Byù rayuq yuq, nang lé zik mù, radéng ê nhâng jáng, yhang eq rahá í déng châng ê byi aq.

⁴² Nang lé dung sù lé, byi aq; náng chyáng mai chyí naù sù lé le, nunghtáng hkâlhik pyám.

Gyè Lé Chyitdap Râ É Hkyô

Luk 6:27-28, 32-36

⁴³ 'Náng é chyangnâm mâ é bang lé gi, chyitdap mù, náng é gyè lé gi, a jú kut aq'✧ gâ é dang lé, nungmoq wó gyô wú bê nghut lhê.

⁴⁴ Nghut kôlhang, Ngò, nungmoq lé taí kôlé, nungmoq gi, mauhkûng htoq mâ é nungmoq é Îwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq;

⁴⁵ hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri.

⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lháng, haù su kut lhê a nghut kó lú?

⁴⁷ Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbâng htoq má haì wá laklaí râ lú? Tûngbaù pé lháng haù su kut lhê a nghut kó lú?

✧ 5:43 Nhung 19:18

⁴⁸ Haû mù, mauhkûng htoq mâ é nungmoq é Îwa gumjup é su, nungmoq le gumjup nyi keq.

6

Alu Byî É Hkyô

¹ Nungmoq dingmán é hkyô lé, byu pé myàng sháng gaq nghû, byu pê hí má a kut shit loshoq, sidiq nyi keq. Haû su kut é nghut jáng, mauhkûng htoq mâ é nungmoq é Îwâ chyáng mai, chyunghuq wó yû kó râ a nghut.

² Haû mù, haû gegùn labyoq kut bang gi, byu pê èq shigyaú é hui sháng gaq ga, tarajong pé hká, hkyô pé hká kut é su, náng gi, alu byî é hkûn, tut htê su hkâlhoq htoq. Ngò, nungmoq lé teng za taí kôlé, haú bang gi, yhangmoq é chyunghuq lé hkúm shoq wó yû bekô nghut lhê.

³ Ra châ to bang lé náng alu byî é hkûn, náng é loqyo loq kut é hkyô lé, loqpaî loq lé lháng hkâsé nhâng.

⁴ Haú hkûn, náng alu byî é lé, ó a châng sé râ nghut lhê. Haû jáng sheq, ó a sé loshoq kut é hkyô lé myang é sù, náng é Îwa gi, nang lé chyunghuq shigyaú râ nghut lhê.

Kyûdûng É Hkyô

Luk 11:2-4

⁵ Nungmoq kyûdûng le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za taí kôlé, haú bang gi, yhangmoq é chyunghuq lé wó yû bekô nghut ri.

⁶ Nghut kôlhang, nàng kyûdûng le, náng é gok hkaû má wang ló mù, hkum myhí pyám luí, a byu-myang é náng é Íwâ chyáng dung aq. Haû jáng, ó a byu-myang é lé myàng sù, náng é Íwa gi, nang lé jeju dum tau byi râ nghut lhê.

⁷ Haû mù, kyûdûng le, tûngbaù pé su kut luí, dang puq hkâhtau kó; hkâsu mù gâ le, yhangmoq gi, dang hîng chín luí dung jáng sheq, gyo byi nhô ngam akô nghut ri.

⁸ Haú bang su hkâkut kó; hkâsu mù gâ le, nungmoq é Íwa gi, nungmoq râ é hkyô lé, nungmoq a dung shi mai sê to Sù nghut lhê.

⁹ Haû mù, nungmoq kyûdûng le,
'Mauhkûng htoq tsáng myhâng mâ é ngamoq é Âwa ê,
Náng é myìng gi, chyoiyúng nyí sháng gaq,

¹⁰ Náng é mingdán jé lô sháng gaq,
Nàng ô nau é hkyô, mauhkûng htoq má dik é su,
myigùng htoq má le dik sháng gaq ô.

¹¹ Ngamoq nyí wuî râ é zoshuq lé, ngamoq lé hkû-nyí byi laq.

¹² Ngamoq lé shut é bâng é mara lé ngamoq hkyut pyám byí é su,
ngamoq é mara lé le hkyut pyám byi laq.

¹³ Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô.

(Hkâsu mù gâ le, kô dik é up sîng hkyô, a-tsam eq hpungwup shîngkang gi, pyat dedu ahtum abyuq Náng chyáng ru joq nyi ri ô! Amen.)*

* **6:13** Chyúmlaika ra-am má, shí túm a bo é nghut lhê.

ngô dung keq.

¹⁴ Supê èq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq mâ é nungmoq é Îwa le, nungmoq lé mara hkyut pyám byi râ nghut lhê.

¹⁵ Nghut kôlhang, haú bâng é mara lé, nungmoq a hkyut pyám byí é nghut le gi, nungmoq é Îwa le, nungmoq é mara lé hkyut pyám byi râ a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tûn shit râ matú myoqdong lhoq nyhuí shit akô nghut ri. Ngò, nungmoq lé teng za tái kôlé, haú bang gi, yhangmoq é chyunghuq wó yû bekô nghut ri.

¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Îwa za myàng sháng gaq, myoq chí pyám luí, u xú but keq;

¹⁸ haú jáng sheq, ó a sé loshoq kut é hkyô lé myang é Sû, nungmoq é Îwa gi, nungmoq lé chyunghuq shigyaú râ nghut lhê.

Mauhkûng Htoq Mâ É Sutzè

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byí é myigùng htoq má, nungmoq é matú, sutzè lé hkâhkong to kó.

²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byí é

mauhkûng htoq má sheq, nungmoq é matú sutzè hkong to keq.

²¹ Hkâsu mù gâ le, náng é sutzè joq jang má, náng é i-myit le jé nyi râ nghut lhê.

²² Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê.

²³ Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyi râ nghut lhê. Náng chyáng bo é maubó gi, mauchut byuq é nghut jáng, mauchut haû gi, hkâ-í yhang htû râ lhê!

²⁴ Ó yuq nghut kôle, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé gi, chyitdap râ nghut lhê; haû a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

Hkâ-myit Chiq Kó

Luk 12:22-31

²⁵ Haû mù luî, Ngò, nungmoq lé taí kôlé, nungmoq é asak matú haî zo haî shuq râ eq nungmoq é gungdû matú haî wut haî tsang râ lé, hkâ-myit chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú?

²⁶ Maulat mâ é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyî pé má le haî a tsîng kat to kô é nghut le lháng, mauhkûng htoq mâ é nungmoq é Íwa gi, yhangmoq lé, byi tso byi huq nyi lhê. Nungmoq gi,

nghoq haú pé htoq má je riyhang hpaudap nyi lhê a nghut kó lúhú?

²⁷ Nungmoq má, ó yuq wá, myit chiq é èq, yhum-sing é asak lé radúng kô wó jat yù kó râ lúhú?

²⁸ Haû nghut le nhîng, haî mù, mebû matú myit chiq akô lúhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkyîng le a duì kó nghut ri.

²⁹ Nghut kôlhang, Ngò, nungmoq lé táí kyo kôlé, hkohkâm Sholumon hpung kô dik u lé wut é mebu lháng, ban haû rabó lé a hkyit nghut ri.

³⁰ Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lháng, Garai Gasang haû su kut hut é nghut le gi, nungmoq lé je riyhang hut râ a nghut kó lúhú?

³¹ Haû mù, 'Haî zo râ lhi?' 'Haî shuq râ lhi?' 'Haî wut râ lhi?' nghû hkâ-myit chiq myhîng kó.

³² Tûngbaù pé kúm gi, haú pé banshoq lé châng hkat ho nyi akô; nghut kôlhang, mauhkûng htoq mâ é nungmoq é Îwa gi, haú pé lé nungmoq râ é hkyô, sé byí nyi lhê.

³³ Nghut kôlhang, Yhâng é mingdán eq dingmán hkyô lé hí hô keq, haû jáng, haú pé banshoq, nungmoq lé puq byi râ nghut lhê.

³⁴ Haû mù, napmá lhê é matú hkâ-myit chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wuîhke hkyô gi, hkû-nyí é matú gé bê nghut ri.

A Jéyáng Râ Hkyô
Luk 6:37-38, 41-42

¹ Nungmoq jéyáng é a hui kó sháng gaq, ó lé le, hkâjéyáng kó.

² Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byi é bung èq, nungmoq lé dum lik byi râ nghut lhê.

³ Yhumsing myoq hkaû má lúng tô é siktúm lé lhang a myit wú é nhîng, haî mù luî, nunggu nungmâng é myoqwàng lé myang lhê lú?

⁴ Yhumsing é myoq má siktúm lhûng to luî nhîng, 'Náng myoq má lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó taí râ lú?

⁵ Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

⁶ Hkuî pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haû su kut jáng, haú bang gi, zè haú pé lé nâng pyeq pyám mù, nungmoq lé dum taû ngat lò râ nghut lhê.

Dung Keq, Hô Keq, Hkum Má Kok Keq
Luk 11:9-13

⁷ Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê.

⁸ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

⁹ Nungmoq má, ó yuq wá, yhumsing yhangzo muk dúng le, luqgok byi kó râ lhú?

¹⁰ Ngozo dúng le, lhangmui* byi kó râ lhú?

¹¹ Agè ashop é bang nungmoq lháng gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang ge é chyunghuq byi râ nghut lhê!

¹² Haû mù, hai hkyô má nghut kôlhang, nungmoq gi, yhumsîng ô nau é dông supé lé kut nhâng nau é su, yhangmoq lé le kut byi keq. Haî mù gâ le, haû gi, jep é tarâ eq myiqhtoî pê é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuî e é nghut mù luî, haû dông wàng bang gi, myô akô nghut ri.

¹⁴ Chyap é hkúmdong eq hkyô zo kúm gi, asak hkyô shut shuî e é nghut mù luî, haû lé myang ho é bang gi, shaû akô nghut ri.

Agàm Eq Ashi

Luk 6:43-45

¹⁵ Nungmoq chyáng jé lé lo é myiqhtoi pyoq pé lé, sidiq nyî keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuî pé nghut akô.

* **7:10** Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lhê.

16 Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyp mai tsibiyiq shi, zugâm mai maihpáng-shi wó yu wú akô lhú?

17 Ge é agàm gi, ge é ashi zui mù, a ge é agàm gi, a ge é ashi za dat zui ri.

18 Ge é agàm gi, a ge é ashi a wó zui, a ge é agàm le, ge é ashi a wó zui nghut ri.

19 Ge é ashi a zuî é shigâm hkanqmó lé gi, htuq pyám mù, myi má dú kat pyám râ nghut lhê.

20 Haû mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

21 Ngo lé, 'Yhumsîng ê, Yhumsîng ê,' ga, wut é bang yuq hkanqmó gi, mauhkûng mingdán má myang wàng kó râ a nghut; haû mauhkûng htoq mâ é Ngá Wa ô nau é dõng kut sù za sheq, myang wàng râ nghut lhê.

22 Haú buinyì má, byù myo myo gi, 'Yhumsîng ê, Yhumsîng ê, Náng é myìng mai, ngamoq gi, myiqhtoi le htoi bê; nat gang lé hkat htoq bê; laklai kumlhá ajung jung lé, kut bê a nghut lhú?' ga luî, Ngo lé myi kó râ nghut lhê.

23 Haú hkûn, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.' nghû, yhangmoq lé san za tû taî kat râ nghut lhê.

Hpaqchyî Bò Sû Eq Ngok Sû

Luk 6:47-49

24 Haû mù, Ngá é dang shí pé lé wó gyô yù luî, châng kut é sù gi, hpaqchyî bò mù, lunghtân htoq má, yhûm saî é sù eq wuí nyi ri.

25 Mau wô, wuì je, laidun lò mù, yhûm haú lé lo htung kôlhang, yhûm haú gi, a htên byoq byuq râ nghut lhê; hkâsu mù gâ le, yhûm haú gi, lunghtân htoq má tsuq tô é yanmai nghut ri.

26 Nghut kôlhang, Ngá é dang lé, wó gyô yù mù, a cháng sù gi, semuî-jàng má, yhûm saî é byù ngok eq wuì nyì râ nghut lhê.

27 Mau wô, wuì je, laidun wò yup dut lò mù, yhûm haú lé lo htung jáng, yù whuì a mù loshoq htên byoq byuq râ nghut lhê." gâ ri.

28 Yesuq mungdang ban taí é hkûn, shiwa byu pé gi, Yhang mhoqshit é hkyô lé maúhong bum akô;

29 hkâsu mù gâ le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

8

Manggâm Dap É Byù Rayuq

Mrk 1:40-45; Luk 5:12-16

1 Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri.

2 Haú hkûn, manggâm dap é byù rayuq gi, Yhâng é hí má, lé mù, hkyihput htuoq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taí ri.

3 Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoí." ga taí kat ri. Haú hkûn jáng, haú yuq é manggâm gi, ge byuq bê nghut ri.

4 Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, yhangmoq

é matú saksé dut sháng gaq, Mosheq taí tô é eq rajung za, hkungga ló nhông byi aq." ga haú yuq lé taí kat ri.

Gyezau Hpô É Lumjǐng Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù,

⁶ "Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyaí no jamjaú leq tô ri." ga garúm lé dung ri.

⁷ Haú hkûn, Yesuq gi, yhang lé, "Ngò, lé lhoq gê byi râ." ga taí kat ri.

⁸ Gyezau hpó haú, Yhang lé dum tû taí é gi, "Yhumsîng ê, Nàng, ngá é laishîn-htâng má, lé nang râ lháng ngò má a gingdán. Nàng, dang rahkun za taí kat laq; haú hkûn, ngá é dui-nhâng zoshâng ge ló râ nghut lhê.

⁹ Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shî kut aq!' nghu le, yhang kut lhê." gâ ri.

¹⁰ Yesuq gi, dang haú lé wó gyo jáng, maú byuq luî, Yhâng htâng cháng bang lé, "Ngò, nungmoq lé teng za taí kôlé, Israelaq amyû má lháng, shî í lumjǐng é sù lé, Ngò, rayuq lé le a myàng wú é nghut lhê.

¹¹ Ngò, nungmoq lé taí kôlé, buihtoq buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poî mó má myang zùng kó râ nghut lhê.

12 Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui lui, haú jowò má ngaubyi ngaù nhap eq zui kyik kyik shoq hpuzô nyi bùm bekô râ nghut lhê." ga taí ri.

13 Hau htâng, Yesuq gi, gyezau lé, "Ló aq hkoi! Nàng lumjìng é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byî É Hkyô

Mrk 1:29-34; Luk 4:38-41

14 Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, ê myang ri.

15 Yesuq gi, yhâng é loq má ê záng kat é hkûn, Petruq yhâng-aumó gi, nòhpyo ge byuq mù, toq lui, Yhang lé wó gaí tso gaí huq bê nghut ri.

16 Myinhâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dâng èq hkat htoq pyám mù, nòhpyo huí é bang banshoq lé lhoq gê byî ri.

17 Haú gi,
"Yhang gi, nga-nhûng é noli nojàng lé yu pyám byi mù, nga-nhûng é noli nojàng lé, wùn waq pyám byi bê nghut ri."✧

ga, myiqhtoi Esai-aq taí tô é dang lhoq dik râ matú nghut ri.

Yesuq Htâng Cháng Râ Bang

Luk 9:57-62

✧ 8:17 Esai 53:4

18 Yesuq gi, Yhâng é lêngkhkyuq má byù moq mó zup míng nyi é lé myàng jáng, Yhâng é chángzô pé lé, nhông hé hpoq shut gú dap ê sháng gâ ri.

19 Haú hkûn, tarâ sará rayuq gi, lé lô mù, "Sarâ ê, ngò gi, Nàng hká e le hká cháng râ nghut lhê." ga Yhang lé lé tâi ri.

20 Haù jáng, Yesuq gi, "Wamhkuî pé gi, hkyûng wó akô; nghoq pé le, nghoqsut wó akô. Nghut kôlhang, haù Byu Yhangzo gi, u nghê jowò lhang a wó nghut ri." ga lhom tâi kat ri.

21 Haú hkûn, chángzo rayuq gi, "Yhumsîng ê, ngá wa lé lô yhûm pyám râ ahkáng hí byi shilaq." ga tâi kat ri.

22 Nghut kôlhang, Yesuq gi, "Shî bê bang gi, shî bê bang yhangchang yhûm lhum kó sháng gaq, nàng gi, Ngá htâng cháng aq." ga dum taù tâi ri.

Laidun Lhoq Zîm É Hkyô

Mrk 4:35-41; Luk 8:22-25

23 Hau htâng, Yesuq lhaî hkaù má wàng mù, Yhâng é chángzô pé le, Yhâng htâng châng wàng bekô nghut ri.

24 Haú hkûn, nhông má byodan-htik laidun mó lò mù, wuìlhêng pé gi, lhaî má bat ûm lò bê nghut ri. Nghut kôlhang, Yesuq gi, yhup myhî tô ri.

25 Chángzô pé gi, Yhâng chyáng jé ê mù, Yhang lé nhaù pun luî, "Yhumsîng ê, hkyi yù laq ô! Nga-nhúng myup ló nyi ri." ga tâi akô.

26 Yhang gi, "Lumjîng myit shaù é bang ê! Haì mù, haù-í gyuq bum akô l hú?" ga tâi kat ri. Hau htâng, Yhang gi, toq luî, laidun eq wuìlhêng pé lé tân kat jáng, banshoq zîm byuq bê nghut ri.

27 Byù haú bang gi, maúhong byuq kômù, "Shí yuq gi, hkasû é byù là? Làì eq wuìhêng pé lhang gi, Yhang é dang lé gyo byí ri myhi-nhung!" ga luí, rayuq eq rayuq myí lhum bum akô nghut ri.

*Nat Wang Júng Su Njik Lé, Lhoq Gê Byí É Hkyô
Mrk 5:1-20; Luk 8:26-39*

28 Yesuq gi, Gadara byu pè é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lhang a wám lai loshoq wuì é su nhik nghut akô.

29 Yhangnhik gi, Yesuq lé, "Garaí Yhangzo ê, Nàng, ngamoq eq haí sêng lhê l hú? Ahkyíng a jé shimá, ngamoq lé zing-ri râ matú jé lé lo é nghut lhê l hú?" ga taí garú akô.

30 Haú mai a lúm wê é jowò má, waq rajùm mó gi, myí dû but zô nyi bum akô nghut ri.

31 Nat gâng pé gi, Yesuq lé, "Nàng, ngamoq lé hkat htoq râ nghut jáng, hê waq pè chyáng wàng nhâng laq." ga dúng akô.

32 Yesuq gi, "Htoq ló keq!" ga taí kat ri. Haú mù, yhangmoq gi, htoq ló luí, waq pè chyáng wàng mù, waq haú jùm gi, gampyoq mai nhông hkaú shut din yán wang ló kôluí, wuì hkaú má myup shi byuq bekô nghut ri.

33 Waq zúng bang gi, myuq hkaú shut h pang din wang ló kômù, dut laí lo é hkyô banshoq lé le, nat gang wang júng huí su nhik hkâsu dut é hkyô lé le, ló taí kyo akô nghut ri.

³⁴ Haû mù, rawa bang gi, Yesuq lé hui râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbán akô nghut ri.

9

Gungjum Shî Sû Lé Lhoq Gê Byî É Hkyô *Mrk 2:1-12; Luk 5:17-26*

¹ Yesuq gi, lhaî má wàng mù, yhumsing é wà shut jî dap ló bê nghut ri.

² Byù ra-am gi, gùngjum shî sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjǐng myit lé byu-myàng jáng, haû gùngjum shî sù lé, "Ngá zo ê, nhik hkâ-ngê; náng é yubak mara lé hkyut pyám byi bê." ga tâi ri.

³ Haú hkûn, tarâ sará pé ra-am gi, yhangmoq é i-myit hkaû má, "Byù shí yuq gi, Garai Gasang lé rhoi dang tâi nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myit hkaû má, haû su agè ashop é dông haî mù myit nyi akô lú?

⁵ 'Náng é yubak mara lé hkyut pyám byi bê.' nghû tái râ eq 'Toq luí, hkyô so aq.' nghû tái râ má, hká hkun je tái lui lê lú?

⁶ Nghut kôlhang, haû Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lê." ga tái lui, haû gùngjum shî sù lé, "Toq aq, náng é taphkang yu chûng lui, yhûm taû ló aq hkoi." ga tâi kat ri.

⁷ Haû mù, haú yuq gi, toq mù, yhûm shut ló byuq bê nghut ri.

⁸ Byù hpûng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

⁹ Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga tái jáng, haú yuq gi, toq lui, Yhâng htâng cháng bê nghut ri.

¹⁰ Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô.

¹¹ Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haí mù lui, kang guq bang eq yubak dap bang eq rahá zo shuq nyi lhê lhú?" ga myî akô.

¹² Yesuq gi, haú su ga kô é lé wó gyo jáng, "Wángzán bang gi, chi sará a ra kó; nõhpyo hui bang za sheq ru râ lhê.

¹³ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.* gâ é lichyúm lé mhoq yû keq. Hkâsu mù gâ le, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga tû tái kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq

* 9:13 Hos 6:6

Hparishe pé gi, zoshuq gám gám kut lhê; nghut kôle, Náng é chángzô pé gi, haî mù a gám kô é lhú?" ga luî, lé myî akô.

¹⁵ Haû mù, Yesuq tû taî é gi, "Bíng pé gi, lusik eq rahá nghut nyi to ashî hkûn, hkâsu ge yón kó râ lhú? Lusik lé, yhangmoq chyáng mai shuí yu pyâm é hkyíng jé râ nghut lhê; haú hkûn kúm gi, yhangmoq zoshuq gám kó râ nghut lhê.

¹⁶ Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám râ nghut lhê.

¹⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik soq htân luî, htûng buq goq byuq mù, tsibiyiq wing le yui shun byuq, htûng le htên byuq, dut râ nghut lhê. Haû mù, tsibiyiq wing asik lé, shokuq htûng sik má kat jáng sheq, haû í jûng é a hten râ nghut lhê." gâ ri.

Shî Bê Myiwe Zo Eq No É Myiwe Myhí
Mrk 5:21-43; Luk 8:40-56

¹⁸ Yesuq haû su ga taî nyi é hkûn, suwún rayuq jé lé lô mù, Yhâng é hí má hkyihput htûq luî, "Ngá zo byizo gi, ahkuí za shi byuq bê. Nghut kôlhang, Nàng lé mù, yhâng é ahtoq má loq lé ke byi laq, haû jáng, yhang, asak dum dui lò râ nghut lhê." ga taî ri.

¹⁹ Yesuq gi, toq mù, Yhâng é chángzô pé eq rahá, haú yuq htâng châng e ló akô.

²⁰ Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushî htâng má ê záng kat ri.

21 Myiwe myhí haû gi, yhang gûng yhang, "Ngò, Yhâng é buhtâng má ê wó záng jáng gi, ge byuq râ nghut lhê." ga, wó myit é yanmai nghut ri.

22 Yesuq gi, lhing wú kat luî, yhang lé myàng jáng, "Ngá zo ê, nhik hkâ-ngê, náng é lumjínng myit gi, nang lé lhoq gê byi bê nghut ri." ga taî ri. Haú hkûn jáng yhang, myiwe myhí haû gi, ge byuq bê nghut ri.

23 Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, ê myâng mù,

24 yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lhê." ga taî jáng, yhangmoq gi, Yhang lé wuizui kut pyám byi akô.

25 Yesuq gi, byù hpûng lé, shinggan shut htoq ló nhâng mù, Yhang wang ê luî, myiwe zo haú lé loq èq zui kat jáng, myiwe zo haû gi, dum dui toq lo ri.

26 Haú hkyo é danglù gi, ramau gón yhang jam ló byuq bê nghut ri.

Myoqjit Í Yuq Eq Nhut Jit Sû Rayuq Lé, Lhoq Gê Byi É Hkyô

27 Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dìn uchyang, "Dawiq é Yhangzo ê, ngá-nhik lé shogyô yù laq ô!" ga wut taî akô.

28 Yesuq gi, yhúmhaû má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byi é lé, nungnhik lumjínng akô luq?" ga myi ri.

Haú hkûn, yhangnhik gi, "Lumjínng lhê ô, Yhumsîng ê." ga tû taî akô.

29 Hau htâng, Yhang gi, haú nhik é myoqjí má ê záng htung luí, "Nungnhik lumjúng é eq rajung za dut sháng gaq." ga tái ri.

30 Haú mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byî ri.

31 Nghut kôlhang, yhangnhik gi, haú hkyô lé, haú mau ramau gón yhang tái pyo ló bekô nghut ri.

32 Haú nhik htoq ló nyî kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô.

33 Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shî su dut é hkyô lé, Israelaq amyû má radàm lháng a myang wú." ga tái bum akô.

34 Nghut kôlhang, Hparishe pé kúm gi, "Nat gâng pé é zaú é wum-o a-tsam èq za, nat gâng pé lé hkat htoq pyâm é nghut ri." ga tái bum akô nghut ri.

Mû Zui Byù Shaú Ri

35 Yesuq gi, myuq pé eq wà pé banshoq má wàng luí, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nòhpyo ajung jung eq nolì nojàng hui bang yuq hkanmó lé, lhoq gê byî wún ri.

36 Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri.

37 Haú mù, Yhang gi, Yhâng é chángzô pé lé, "Kyôshû yù râ myo shoq joq kôlhang, mù zui râ byù gi, shaú nyi ri.

38 Haû mù, haû kyô Yhumsîng lé, Yhâng é kyô yô má, kyô shu byù myo myo nhâng byi râ matú, dung keq." ga taî ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nòhpyo ajung jung lé wó lhoq gê râ ahko ahkáng yhangmoq lé byî ri.

² Haû lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan;

³ Hpilip eq Barhtolume; Htomaq eq kang guq sù Mahte; Alhpe é yhangzo Yakuq, Htade,

⁴ Zelutuq* dut é Simun eq, Yesuq lé ap pyám râ sù, Yudaq Ískarut pé nghut akô.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbaù pé chyáng le hkâ-ê kó; Samariq wà rawà má le hkâwâng kó.

⁶ Haû byuq byuq é sau pé su nghut nyi é Israelaq byu pé chyáng sheq ê keq.

⁷ Nungmoq gi, ê mù, 'Mauhkûng mingdán gi, chyáng lò bê nghut ri.' nghu é danglù lé hko kyo keq.

* **10:4** *Zelutuq* gâ é lichyúm gi, yhumsîng zui sai é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, *Zelutuq* gâ lhê.

8 Nò bang lé lhoq gê byi, shî bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq.

9 Nungmoq é hpyihit má, hîng, ngùn eq gyi pé hkâkat chûng kó;

10 hkyowui é matú, etap, mebu htaí, hkyî-tsung eq dumbáng pé hkâyü chûng kó; hkâsu mù gâ le, mù zui sù gi, zoshuq wó gíng lhê.

11 Hká wâ hká dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhûm má za nyi nyi keq.

12 Haú yhûm má wang é hkûn, shichyên yù keq.

13 Haú yhûm gi, gingdán é nghut jáng, nungmoq shimân byî é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taù lò sháng gaq.

14 Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq ló é hkûn, nungmoq é hkyiwa má dap é hpuilhaù lé ko hkyô pyâm to keq.

15 Ngò, nungmoq lé teng za taí kôlé, tarâ jéyáng é buinyi má, haú wâ gi, Sodom eq Gomoraq myuq htoq má je hpuzo râ nghut lhê.

16 Wamhkuì hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmuì su hpaqchyî bò luí, hpûngkyui su nú-nhâm nyi keq.

17 Byu pé lé sidiq keq; hkâsu mù gâ le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê.

18 Nungmoq gi, Ngá é yanmai, mauzau wuì eq hkohkam pê é hí má shuí jé é hui luì, yhangmoq é hí má le, tungbaù pê é hí má le, saksé myang hkám kó rá nghut lhê.

19 Nghut kôlhang, nungmoq lé ap pyám kô é hkûn, nungmoq hkâsu taí rá eq haí taí rá lé, hkâ-myit chiq kó. Haú hkûn taí rá dang, nungmoq wó kó rá nghut lhê.

20 Hkâsu mù gâ le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí rá ru nghut lhê.

21 Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó rá nghut lhê; zo wuì gi, mó wuì lé gumlau toq mù, sat pyám nhâng kó rá nghut lhê.

22 Byù lhunglhang bang gi, Ngá é yanmai, nungmoq lé a nguì kut kó rá nghut lhê; nghut kôlhang, jih túm jé shoq wó hkam jân nyi é sù gi, hkyi yu é hui rá nghut lhê.

23 Rawò má zing-ri é hui jáng, rawò shut hpang ê keq. Ngò, nungmoq lé teng za taí kôlé, Israelaq byu pê é myuq pé má, nungmoq a ban wang ngap shimá, haú Byu Yhangzo jé rá nghut lhê.

24 Jongzo gi, sará htoq, dui-nhâng zoshâng gi, yhumsing htoq, gyaú rá a nghut.

25 Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq[†] ga kô le gi, Yhâng é yhumbyù wuì lé gi, je riyhang nghû kó rá a nghut l hú?

[†] 10:25 Bezebulaq gâ é gi, Tsadán é myíng rajà nghut lhê.

26 Haû mù, yhangmoq lé hkâgyuq kó. A byông htoq loshoq wó zaú nghop tô é haí le a joq râ nghut lhê; a sé loshoq wó haq tô é le, haí a joq râ nghut lhê.

27 Ngò, nungmoq lé mauchut hkaû má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkûng htoq mai taí pyô keq.

28 Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sû lé sheq, gyuq nyí keq.

29 Johkyáng í du lé, gyi htingchap rachap èq wó ûng pyám lhê a nghut kó lú? Nghut kôhang, haû radu lhang, nungmoq é Íwâ é myit èq a nghut jáng, myigùng má wó byit gyó râ a nghut.

30 Nungmoq é ulhum mâ é xâm banshoq lé lhang, nghap to gù nghut lhê.

31 Haû mù, hkâgyuq kó; nungmoq gi, haû johkyáng myo myô htoq má lhang gù je bo é bang nghut lhê.

32 Byu pê hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wâ é hí má, Ngò lhom yín yû râ nghut lhê.

33 Byu pê é hí má, Ngo le he-ngik pyám é sù ó yuq lé nghut kôle, mauhkûng htoq mâ é Ngá Wâ é hí má, Ngò he-ngik pyám râ nghut lhê.

34 Ngo lé, haû myidàm htoq má simsaq hkyô byi râ matú lé lo é sù su hkâ-ngâm kó. Ngò gi, simsaq hkyô byi râ matú lé lo é a nghut, sâm byi râ matú

sheq lé lo é ru nghut lhê.‡

³⁵ Hkâsu mù gâ le,

'Yuqzo gi, yângwa eq, byizo gi, yângnu eq, dumó gi, yângmhoí eq, byoq lhum kó râ nghut lhê.

³⁶ Yhumsing é yhumbyù wuì gi, yhumsing é gyè taù dut râ nghut lhê.✧

gâ tô é matú sheq, Ngò jé lé é ru nghut lhê.

³⁷ Ngo lé chyt é htoq yhumsing é înu îwa lé je chyt é sù ó yuq nghut kôle, Ngá é chángzo kut râ gingdán sù a nghut; Ngo lé chyt é htoq yhumsing é zo wuì lé je chyt é sù ó yuq nghut kôle, Ngá é chángzo kut râ gingdán sù a nghut;

³⁸ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut râ gingdán sù a nghut.

³⁹ Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhum-sing é asak sùm pyâm é sù ó yuq nghut kôle, asak wó râ nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haù Ngo lé nhang kat Sù lé hap yu é sù nghut bê.

⁴¹ Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yù râ nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yù râ nghut lhê.

‡ **10:34** Yesuq gi, simsaq hkyô byi sù nghut lhê. Nghut kôhang, Yhang é yanmai, byu pé mabyoq htoq râ nghut é hkyô lé sé mù, haù su ga taí é nghut lhê. ✧ **10:36** Mihka 7:6

42 Shî, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù râ za nghut lhê." gâ ri.

11

Yesuq Eq Wui-myhup Sará Yohan

Luk 7:18-35

¹ Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit râ matú eq hko kyo râ matú, haú jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaû má wó gyo jáng,

³ "Nàng gi, haú jé lé lô râ Sù nghut lhê lú? Haú a nghut jáng, ngamoq gi, góyuq lé lán ra shirâ lú?" ga, yhâng é chángzô pé lé myi nhang kat ri.

⁴ Yesuq tâ taí é gi, "Nungmoq wó gyo wó myang é hkyô, Yohan lé ló taí kyo keq;

⁵ myoqjit bang, myoq wó myâng bekô; hkyi hten bang le, wó so bekô; manggâm dap bang le, lhoq gê byi é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê.

⁶ Ngá é yanmai, Ngo lé lum shut é hkyô a bò sù gi, hkungsô wó nyi ri." ga tâ ri.

⁷ Yohan é chángzô pé taú ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haí lé hpuq wú râ matú, haú yoso shut e akô lú? Lai eq hik nhûn é jamgàm lé wú râ matú nghut akô lú?"

⁸ Haû a nghut jáng, haî lé wú râ matú e akô lúhú? Nú-nhâm é mebu wut sù lé wú râ matú e akô lúhú? A nghut. Nú-nhâm é mebu wut bang gi, hkohkâm-wâng pé má sheq rû nyi lê.

⁹ Haû nghut lé gi, haî lé wú râ matú ê kô é lúhú? Myiqhtoi rayuq lé lúhú? Haû kúm nghut ri; Ngò, nungmoq lé taí kôlé, Yohan gi, myiqhtoî htoq lhang gyaú sù nghut lê.

¹⁰ Haú yuq é hkyô lé, Chyúmdang má kâ tô é gi, 'Wú aq, Náng é hkyô lajang lánng râ matú, Ngá é lagyo lé, Náng é hí má Ngò nhang kat râ nghut lê.'[☆]

gâ ri.

¹¹ Ngò, nungmoq lé teng za taí kôlé, myiwe wui mai hku kat é bang má, Wui-myhup Sará Yohan htoq je kô é rayuq lhang a htoq wú shi; nghut kôlhang, Garai Gasâng é mauhkûng mingdán má je tiq dik sù gi, Yohan htoq je kô lê.

¹² Wui-myhup Sará Yohan é buinyì mai ahkuî jé shoq, mauhkûng mingdán gi, lú chyîn wang nyi é hui mù, sarhé pé gi, haú lé wó yû bekô nghut ri.

¹³ Hkâsu mù gâ le, Yohan é ahkyíng jé shoq, haú myiqhtoî pé banshoq eq tarâ gi, haú hkyô eq séng luî, myiqhtoi htoî to gù nghut lê.

¹⁴ Nungmoq hap yù nau é nghut jáng, Yohan gi, haú jé lé lô râ ga sù Eliyaq nghut lê.[☆]

¹⁵ Gyô yù râ nohkyap dap sù gi, gyô yù sháng gaq.

¹⁶ Shí ipyat lê é byu pé lé, Ngò, hai eq taí kê wú râ lúhú?

¹⁷ Yhangmoq gi,

'Nungmoq é matú, ngamoq sampyí mut byi kôlhang, nungmoq gi, a gó kó; ngamoq, ngaù hkyangsâng kôlhang, nungmoq gi, a ngaù kó.'

ga luí, gài pé má zùng mù, góbang lé wut taí lhùm nyi é zoshâng wuì eq wuí akô.

¹⁸ Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô.

¹⁹ Haù Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. Nghut kôlhang, hpaqchyí byéng-yá gi, yhâng é muzó èq saksé tûn shit nyi ri." gâ ri.

Myit A Lhîng É Wà Mó Pê Hkyô

Luk 10:13-15

²⁰ Hau htâng, Yesuq gi, laklaí kumlhá pé je myo kut shit bê nghut kôlhang, myit a lhing é myuq pé lé tân é gi,

²¹ "Kurazin và mó ê! Nàng dingnyé wó ri! Bet-saida và mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut bekô rá nghut lhê.

²² Ngò, nungmoq lé taí kôlé, tarâ jéyáng é buinyì má, nungmoq gi, Turuq myuq eq Sidun myuq htoq má je hpuzo kó rá nghut lhê.

²³ Dum mù, Kaperna-um và nàng ê, nàng gi, mauhkûng jé shoq waq toq é hui râ lhú? A nghut,

mosumhkung má sheq gyó râ nghut lhê. Náng chyáng kut shit é laklai kumlhá lé, haû Sodom wà má kut shit é ru nghut le gi, myuq haû hkû-nyí jé shoq joq nyí râ nghut lhê.

24 Ngò, nungmoq lé taí kôlé, tarâ jéyáng é buinyì má, Sodom wà hpuzô é gi, náng htoq shau râ nghut lhê." gâ ri.

Ngú Nyí Bâng É Matú Bánno Jang

Luk 10:21-22

25 Haú u lé, Yesuq taí é gi, "Mauhkûng eq myi-gung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wuì lé tân shit bê nghut é yanmai, Ngò, Nang lé hkya-on lhê ô.

26 Nghut bê, Áwa ê, haû gi, Nàng ô nau é hkyô nghut ri.

27 Ngá Wa gi, lhunglhang lé Ngá é loq má ap byí to bê. Haû Zo lé, Áwa mai lai luí ó le a sé; Áwa lé le, haû Zo eq haû Zo mai sé nhâng râ matú hkyin yu é bang mai lai luí ó a sé.

28 Ngú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê.

29 Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yû keq; haû hkûn, nungmoq é asak woi-nyí bánno kó râ nghut lhê.

30 Haí mù gâ le, Ngá é kandang gi, waq lui é htoq agó, Ngá é wò le sôm lhê." gâ ri.

12

Bánno Buinyi É Yhumsîng

Mrk 2:23-28; 3:1-6; Luk 6:1-5, 6-11

¹ Haú yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaû mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yû mù, zô akô nghut ri.

² Hparishe pé gi, haú lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akô." ga taí kat akô.

³ Haú hkûn, Yesuq tû taí é gi, "Dawiq lháng gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lú?"

⁴ Dawiq gi, Garai Gasâng é yhúmhkaû má wang é mù, hkyangjông pé mai lai lui, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lú?

⁵ Hau htoq agó, Bánno buinyi má, hkyangjông pé gi, noqkuq yhúmhkaû má Bánno buinyi é tarâ lé shut kôlháng mara a wó é lé, haú tarâ laiká má nungmoq a nghap wú kó lú?

⁶ Ngò, nungmoq lé taí kôlé, haú noqkuq yhûm htoq je ko sù gi, shí má nghut nyi lhê.

⁷ Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê'☆ gâ é lichyúm lé nungmoq sé kô é ru nghut le gi, mara a bò bang lé mara hûn kó râ a nghut.

⁸ Hkâsu mù gâ le, haú Byu Yhangzo gi, haú Bánno buinyi é Yhumsîng nghut lhê." gâ ri.

⁹ Hau htâng, Yhang gi, haú jowò mai e ló mù, yhangmoq é tarajong má wang e ló ri.

☆ 12:7 Hos 6:6

10 Loq rahkyam ajum shi byuq é byù rayuq le, haú má nyi tô ri. Yhangmoq gi, Yesuq lé, "Bánno buinyi má, nòhpyo lhoq gê byi le, tarâ wang lhê lhú?" ga myi é dông, Yhang lé mara hùn râ hkyô ho akô nghut ri.

11 Haú hkûn, Yesuq gi, "Nungmoq chyáng mâ é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó râ lhú?"

12 Byù gi, saù htoq má hpaudap dik é nghut lhê! Haù mù, Bánno buinyi má ge é hkyô kut le, tarâ wang lhê." ga yhangmoq lé tû tâi ri.

13 Hau htâng, Yhang gi, haù loq jum shi sù lé, "Náng é loq nyhang kat aq." ga tâi kat jáng, haù yuq gi, loq nyhang kat jáng, loq haù gi, a no é loq su ge byuq bê nghut ri.

14 Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chôm hpyê lhum bum akô nghut ri.

Garai Hkyin Tô É Dui-nhâng Zoshâng

15 Yesuq gi, haù hkyô lé sé jáng, haù jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nòhpyo hui bang banshoq lé lhoq gê byi luí,

16 Yhang ó yuq nghut é hkyô lé, a tâi byông htoq râ matú, yhangmoq lé tâi hkûm tô ri.

17 Haù gi, myiqhtoi Esai-aq é nhut dông mai tâi tô é dang lé lhoq dik râ matú nghut ri. Dang haù pé gi,

18 "Shí yuq gi, Ngò chyt, Ngò myit nguí luí, hkyin tô é Ngá é dui-nhâng zoshâng nghut lhê; Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myû ban-shoq pé má taî kyo râ nghut lhê.

19 Yhang gi, haî a hpuq tû é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

20 Yhang gi, tarâ dingmán é hkyô lhoq ung é hkûn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyî bê myi lé le, lhoq sat pyám râ a nghut.

21 Byù myû chângjup gi, Yhâng é myìng má myit myoqbyù kó râ nghut lhê."☆

gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

22 Hau htâng, agè ashop é nat gang wang júng luî, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byî ri; haú mù, haú yuq gi, dang le wó nyô, myoq le wó myâng dut bê nghut ri.

23 Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga taî bum akô.

24 Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pê é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga taî bum akô nghut ri.

25 Yhangmoq myit nyi é hkyô lé Yesuq sé mù, yhangmoq lé taî é gi, "Hká mingdán nghut kôle, ahkaû má byoq gâng lhûm nyi kô é nghut jáng,

☆ 12:21 Esai 42:1-4

* 12:24 Bezebulaq gâ é gi, Tsadán é myìng rajà nghut lhê.

htên byoq byuq râ za nghut lâhê; haû eq rajung za, myuq ralhum nghut nghut, yhumhtu ralhum nghut nghut, yhangchang byoq lhûm nyi kô é nghut jáng, haû gi, wó gîng nyi râ a nghut.

²⁶ Tsadán gi, Tsadán lé hkat htoq pyâm é nghut jáng, yhumsing gùng yhumsîng lhoq hpyoq nyi gù bê nghut ri. Haû su nghut jáng, yhâng é mingdán gi, hkâsu kut wó gîng to râ lúhú?

²⁷ Haû mù luí, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyám kô é nghut lâhê lúhú? Haû su nghut jáng, haû bang gi, nungmoq lé tarâ jéyáng bang dut kó râ nghut lâhê.

²⁸ Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

²⁹ Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhûm má lú wâng mù, yhâng é sutzè lé hkâsu wó lú yû râ lúhú? Haû yuq lé hí tuí zing pyám jáng sheq, yhâng é sutzè lé wó lú yû râ nghut lâhê.

³⁰ Ngá hkyam shut a dap sù gi, Ngo lé gyè kut sù nghut lâhê; Ngò eq rahá a shûm tsing sù gi, lhoq pyo pyâm é sù nghut nyi ri.

³¹ Haû mù, Ngò, nungmoq lé taí kôlé, byu pé é yubak mara hkangmó eq Garai Gasang lé rhoi dang taí pyâm é lhunglhang gi, mara hkyut byí é wó hui râ nghut lâhê. Nghut kôlhang, haû Chy-oiyúng Woi-nyí lé rhoi dang taí pyâm é gi, mara hkyut byí é hui râ a nghut.

³² Haû Byu Yhangzo lé dang dông shut é sù gi, mara hkyut byî é wó hui râ nghut lhê; nghut kôlhang, haû Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byî é hui râ a nghut.

³³ Ashi lé wú luí, agàm lé sé râ nghut é yanmai, agàm lé lhoq gê jáng, ashi le gè râ nghut lhê; agàm lé a lhoq gê jáng, ashi le gè râ a nghut;

³⁴ Duq htân lhangmuì amyû ê, nungmoq gi, agè ashop é bang nghut to kôluí nhing, dang gè hkâsu wó taí kó râ lhu? Hkâsu mù gà le, i-myit unghkaû má byíng mui tô é lé za, nhut mai taí htoq lo é nghut lhê.

³⁵ Ge é sù gi, yhumsing é i-myit unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaû mâ é agè ashop é sutdò mai, agè ashop é zè pé lé lhoq htoq shit lhê.

³⁶ Ngò, nungmoq lé taí kôlé, byù gi, yhumsing taí kat é akyû a bo é dang pé é matú, tarâ jéyáng é buinyì má taí sân kyo ra kó râ nghut lhê.

³⁷ Hkâsu mù gà le, yhumsing mara lut râ le, ó le ó taí é dang pé mai; mara byî é hui râ le, ó le ó taí é dang pé mai, nghut râ nghut lhê." gà ri.

Limik Kumlhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tarâ sará pé ram gi, "Sarâ ê, ngamoq gi, Nàng, limik kumlhá kut shit râ lé myàng nau ri." ga Yhang lé dúng akô.

³⁹ Haû mù, Yhang tû taí é gi, "Agè ashop é eq lhum a zuí é ipyat shî gi, limik kumlhá dung nyi

ri myhi-nhung! Myiqhtoi Yonaq é kumlhá mai lai luí, gotû haí le tân shít râ a nghut.

⁴⁰ Hkâsu mù gâ le, Yonaq gi, ngo mó é wamdau hkaû má sum nyí sum myîn lúng é su, haû Byu Yhangzo le, myigùng káng má sum nyí sum myîn lúng râ nghut lâ.

⁴¹ Ninewe wà byù wuì gi, Yonaq mungdang hko kyô é hkûn myit lhîng kô é nghut mù, tarâ jéyáng é buinyì má, ipyat shí mâ é bang eq rahá toq lò luí, ipyat shí mâ é bang lé mara hûn kó râ nghut lâ; haû Yonaq htoq ko sù gi, ahkuí shí má jé nyi to bê.

⁴² Maupyî má é hkohkâm myhí gi, maumyî ló htâng é mai lé lô mù, Sholumon é hpaqchyî dang lé, lé gyô yù bê nghut mù, haû tarâ jéyáng é buinyì má, ipyat shí mâ é bang eq rahá toq lò luí, ipyat shí mâ é bang lé mara hûn râ nghut lâ; haû Sholumon htoq ko sù gi, ahkuí shí má jé nyi to bê.

⁴³ Haû agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri.

⁴⁴ Haú hkûn, yhang gi, 'Ngò nyi laí lo é yhûm má dum taû ló wú râ.' ga taí ri. Yhang dum taû jé ló wú le, yhûm haú lé, ó le a sing yu hpyuq é htoq agó, san za rago dut to lánq é lé ló myang ri.

⁴⁵ Haû jáng, yhang gi, dum taû ê mù, yhâng htoq je wuí é nat nyhit nat lé shuí lò luí, haú má lo wang nyi to bekô. Haû mù, haú yuq é nyi yap sâmlai gi, hí lâ htoq má je wuí lò bê nghut ri; agè ashop é ipyat shí le, haû eq rajung za dut râ nghut lâ." gâ ri.

*Yesuq É Yhângnu Eq Yhanggû Pé
Mrk 3:31-35; Luk 8:19-21*

⁴⁶ Yesuq, shiwa byu pé lé dang rû nyo nyi ashî hkûn, yhângnu eq yhanggu pé gi, Yhang lé nyò naù kômù, shinggan má lé yap tô akô nghut ri.

⁴⁷ Haù mù, Yesuq lé, "Náng nu eq nunggu pé gi, Nang lé nyò naù mù, shinggan má láng yap bum akô." ga taì kyô akô.

⁴⁸ Haù hkûn, Yhang gi, "Ô pé gi, Ngá nu eq Ngá gu pé nghut akô lhú?" ga tû taì kat ri.

⁴⁹ Hau htâng, Yhang gi, Yhâng é chángzô pé lé loq tun luì, "Wú keq, shí bang gi, Ngá nu eq Ngá é gumang wuì nghut bê.

⁵⁰ Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taì ri.

13

Kyôshi Sân É Dangtú

Mrk 4:1-20; Luk 8:4-15

¹ Haù nyí má yhang, Yesuq gi, yhúmhkaù mai htoq ló mù, wuì nhông yàm má ê zung tô ri.

² Byù hpûng mó gi, Yhâng é lhîngghyuq má zup zîng lé bùm kô é yanmai, Yhang gi, lhaì hkaù má doq zùng tô ri. Shiwa byu pé kúm gi, gin-gau htoq má yap tô bum akô.

³ Hau htâng, Yhang gi, haù bang lé, dangtú pé dông myo myo taì é má, "Kyô hkyó sù rayuq gi, kyôshi san râ ga htoq e ló ri.

⁴ Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri.

⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, luì za yuq htoq lô kôle,

⁶ amyit a wó chin hing é nghut mù, buì htoq lô jáng, lhap kyuq pyám bê nghut ri.

⁷ Dum ra-am gi, zugyóm hkaû má gyó ang luì, zubyap haú pé kô lò mù, wup pyâm ri.

⁸ Ra-am dum nghut jáng, myìhpún bo é jang má gyó ang luì, ashi zuì lo é gi, sân kat é htoq rashô tú, hkyuq xê tú, sum xê tú, myô jat lo é nghut ri.

⁹ Gyô yù râ nohkyap dap sù gi, gyô yù sháng gaq." ga le taí ri.

¹⁰ Haú hkûn, chángzô pé gi, Yhâng chyáng lé mù, "Nàng gi, haì mù, shí bang lé, dangtú đông taí lê lhu?" ga myì akô.

¹¹ Haú jáng, Yhang tû taí é gi, "Mauhkûng mingdán eq sêng é sê gyo wuì é hkyô pé lé sê gyo râ ahko ahkáng, nungmoq lé byì to bê, nghut kôlhang, yhangmoq lé gi, a byi shí é nghut lê.

¹² Wó to sù lé gi, yhang agùn agó wó râ matú, jat byi shirâ nghut lê. A wó su chyáng mai kúm gi, yhang wó tô é lé lhang yu pyám byi shirâ nghut lê.

¹³ Yhangmoq gi, wú to kôlhang, a myàng kó; gyô nyì kôlhang, a wó gyo, a sê gyo kó nghut é yanmai, yhangmoq lé Ngò dangtú đông taí râ é nghut lê.

¹⁴ Haú gi,
'Nungmoq gi, wó gyô tô nyì kôlhang, sê gyo kó râ a nghut;

myang tô nyì kôlhang, wú sé kó râ a nghut.

¹⁵ Hkâsu mù gâ le, byù shí bang gi, myit nhikshi jit byuq bê;

yhangmoq é nohkyap gi, a wó gyo kó,

myoqjí le chûm byuq bekô nghut ri.
 Haû su a nghut le gi, yhangmoq, myoq myàng no
 gyo mù,
 i-myt bun bóng luî, lhîng lò kômù,
 Ngò, yhangmoq lé yâ gè byi berâ nghut lhê.¹⁶✧
 gâ é, Esai-aq é myiqhtoi dang lé lhoq dik é nghut
 ri.

¹⁶ Nghut kôlhang, nungmoq é myoq gi, wó myâng
 mù, nungmoq é nohkyap gi, wó gyô é yanmai,
 nungmoq gi, hkungsô wó nyi ri.

¹⁷ Hkâsu mù gâ le, Ngò, nungmoq lé teng za taí kôlé,
 nungmoq wó myâng, wó gyô é pé lé, myiqhtoî pé
 eq dîngmán bang myo myo gi, myàng nau gyo nau
 kôlhang, a wó myâng, a wó gyo kó nghut ri.

¹⁸ Ahkuî, kyôshi san sù eq sêng é dangtû é
 lichyúm lé rago gyô wú keq;

¹⁹ Hkyô má gyó âng é kyôshi gi, mauhkûng
 mingdán eq sêng é danglù lé wó gyo kôlhang, a sê
 gyô é yanmai, haû agè ashop sù lé lô mù, yhâng é
 i-myt hkaû má san kat tô é kyôshi lé, lé yu pyám
 byî é hui sù lé gá nau é nghut lhê.

²⁰ Luqgok yò pé má gyó âng é kyôshi gi, mung-
 dang lé wó gyo jáng, radá dâm gabú myit eq hap yù
 kôlhang,

²¹ amyit a wó chîn é yanmai, razup zo za yuq
 mù, mungdâng é yanmai, wuîhkê é eq zing-rî é hui
 kôjáng, hân hân htak ló byuq é sù lé gá nau é nghut
 lhê.

²² Zugyóm má gyó âng é kyôshi gi, haû mungdang
 lé wó gyô yù kôlhang, shí ipyat lhê é myit wui myit
 hke hkyô pé eq hkyô shuî nghoq jung ngùn hîng

✧ 13:15 Esai 6:9-10

zèhkoq èq hup pyâm é yanmai, ashi a wó zuí é sù lé gá nau é nghut lhê.

²³ Nghut kôlhang, myìhpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haú yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri.

²⁵ Byu pé yhup myhí tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luí, taú ló byuq bê nghut ri.

²⁶ Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

²⁷ Yhumsîng hpô é dui-nhâng zoshâng wuì gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myi kôjáng,

²⁸ haú yhumsîng hpó gi, 'Gumlau gye èq kut é nghut ri.' ga tú taí ri.

Haú jáng, dui-nhâng zoshâng wuì gi, 'Ngamoq, myoq haú pé lé ê nut pyám râ lé, nàng ô nau ri lhú?' ga myí akô.

²⁹ Haú hkûn, yhang gi, 'Hká nut pyám kó; hkâsu mù gâ le, nungmoq, myoq haú pé lé nut é hkûn, guq gàm pé lé le bo záng nut pyám kó râ nghut lhê.

³⁰ Kyôshu yoq jé shoq rahá yuq to kó sháng gaq; haú hkûn, myoqgàm pé lé hí hkyin tsîng yù mù, nyhê hkyô pyám râ matú hkyom dîng to luí, guq lé kúm gi, shú yù mù, ngá é chyí má tsîng kat to râ

matú, kyô shu bang lé ngò taí râ nghut lhê.' ga tû taí ri." gâ ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhum dum xoq taí é gi; "Mauhkûng mingdán gi, byù rayuq èq, yhâng hkyâm má hô tô é angshi cham eq wuí ri.

³² Angshi cham haú gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taí é gi, "Mauhkûng mingdán gi, myiwe rayuq èq sungso mún sum bûng má yu nyhó luí, haú pé banshoq lé wó lhoq dau nhang é múnchi eq wuí ri." gâ ri.

³⁴ Yesuq gi, byù moq mó lé, haú pé banshoq dangtú dông mai chyat taí ri; yhangmoq lé, dangtú a bo é haí lháng a taí wú nghut ri.

³⁵ Haú gi,
"Ngá nhut lé hpóng mù, dangtú dông mai taí râ;
mingkan lé sân-hi hpan é mai zaú tô é hkyô pé lé
taí sân kyo râ nghut lhê."✧
ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq ló mù, yhúmhaú má wang ló ri. Haú hkûn, Yhâng é chángzô pé gi, Yhâng chyáng lé lô kômù, "Yò mâ é

✧ 13:35 Hkya-on 78:2

myoqgàm dangtú eq sêng é hkyô lé taí sên kyo laq." ga taí akô.

³⁷ Haû jáng, Yhang tû taí é gi, "Ge é kyôshi san sù gi, haû Byu Yhangzo nghut ri.

³⁸ Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haû Tsadán é yhangzô pé nghut akô;

³⁹ haú lé châng hkat sên é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

⁴⁰ Haû myoqgàm pé lé, nut yù mù, myi má nyhê pyâm é su, haû mingkan htûm é ahkyíng má dut rá nghut lhê.

⁴¹ Haû Byu Yhangzo gi, Yhâng é maumang lagyô pé lé nhâng rá nghut lhê; haû mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglhang lé, Yhâng é mingdán mai hkyin she htoq yù mù,

⁴² gyúng nyi é myibung hkyûng hkaû má dú kat pyám kó rá nghut lhê; hau má, ngaubyi ngaù nhap eq zùi kyik kyik shoq hpuzô nyi kó rá nghut lhê.

⁴³ Haú hkûn, dingmán bang gi, yhangmoq Yhângwâ é mingdán má bui su duqbó nyi kó rá nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit eq taú ló luí, yhang wó é banshoq lé ûng pyám mù, yò haú lé wui yu ri.

45 Dum, mauhkûng mingdán gi, réng é palhé lé châng ho wún é hpugá hpó eq wuí ri.

46 Yhang gi, gyai hpaû é palhé lé myàng jáng, yhang wó é banshoq lé ló ûng pyám mù, haú lé wui yu ri.

Gùn Lé Dangtú Yu É Hkyô

47 Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri.

48 Gùn haú má ngozo byíng jáng, ngo kóng bang gi, wui yàm má she htoq yû mù, zung to luí, ge é pé lé gi, ngo-pyap má guq kat yû luí, a ge é pé lé gi, dú pyám akô.

49 Haú eq rajung za, mingkan htûm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yû luí,

50 ngaubyi ngaù nhap eq zuì kyik kyik shoq hpuzô nyi râ nghut é, gyúng nyi é myibung hkyûng hkaú má dú kat pyám kó râ nghut lhê.

51 Shí hkyô banshoq lé nungmoq sê gyo bekô lhú?" gâ ri.

Haú hkûn, yhangmoq gi, "Sê gyo bê." ga tû taí akô nghut ri.

52 Hau htâng, Yesuq gi, yhangmoq lé, "Mauhkûng mingdán eq séng luí mhoq yû bê é tarâ sará ó nghut kôle, yhang mhoq é hkyô gi, yhumsing é sut-púnglhúng hkaú mai zè sik zè xau lé yu htoq é yhumsing hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

53 Yesuq gi, dangtú haú pé lé ban taí jáng, haú jowò mai htoq e ló bê nghut ri.

⁵⁴ Yhang gi, Yhâng é yhummau má jé ló jáng, byu pé lé, yhangmoq é tarajong má mhoqshit ri; haú hkûn, yhangmoq gi, gyô maú byuq kôluí, "Byú shí yuq gi, hpaqchyí byéng-yá shî eq hpungwup a-tsam mó shí pé lé, hkâmai wó yu é nghut lhê lhà?"

⁵⁵ Yhang gi, laksîma hpô é yhangzo a nghut lhú? Yhângnû é myîng gi, Mariq gâ lhê a nghut lhú? Yhanggû pé gi, Yakuq, Yosep, Simun eq Yudaq gâ é bang a nghut kó lhú?

⁵⁶ Yhâng nhammó pé le, nga-nhúng eq rahá nghut nyi lhê a nghut kó lhú? Haú su nghut le nhîng, haú pé banshoq lé, Yhang hkâmai wó yu é nghut lhê lhà?" ga myî bùm kômù,

⁵⁷ Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhûm má za, myoqdong a lhaq wó wú é nghut lhê." ga tâ tâ kat ri.

⁵⁸ Yhangmoq lumjîng myit a bò kô é yanmai, Yesuq gi, haú má, laklaí kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô Mrk 6:14-29; Luk 9:7-9

¹ Haú hkûn, mauzau Herut gi, Yesuq eq sêng é ludang lé wó gyo jáng,

² yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shi é mai dum dui toq lo é nghut mù, hpungwup a-tsam haú pé lé wó kut é nghut ri." ga tâ ri.

³ Herut haû su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri.

⁴ Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byî nyi é yanmai nghut ri.

⁵ Herut gi, Yohan lé sat pyám naû kôlhang, ming-byû wui lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyí kô é yanmai nghut ri.

⁶ Nghut kôlhang, Herut é hkû ladu hkyúm buinyì má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù,

⁷ byizo haú lé, yhang haí dung le haí byi râ ga dakam é danggidiq byî ri.

⁸ Byizo haú gi, yhângnu hpaqchyî byî é lé gyô yù mù, "Shî, bó má, Wui-myhup Sará Yohan é ulhum lé, kat byi laq." ga, Herut lé dúng ri.

⁹ Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, yhang dúng é lé, byi râ matú,

¹⁰ htóng hkaû má lúng tô é Yohan é ulhum lé hpyit râ hkunmó hkyô kat bê nghut ri.

¹¹ Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhângnú chyáng yu ló byî ri.

¹² Haú mù, Yohan é chángzô pé gi, yhâng é mâng lé lé yû luí, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyîng Lé Byi Tsô É Hkyô
Mrk 6:30-44; Luk 9:10-17; Yhn 6:1-14

¹³ Yesuq gi, haú hkyô lé wó gyo jáng, haú mai lhaí ji mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e ló akô nghut ri.

¹⁴ Yesuq gi, lhaí mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byí ri.

¹⁵ Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bù le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuí kó sháng gaq, yhangmoq lé nhang kat aq hkoi." ga taí akô.

¹⁶ Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

¹⁷ Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

¹⁸ Haú jáng, Yesuq gi, "Yu lò keq." ga tû taí mù,

¹⁹ shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byí ri. Haú chángzô pé gi, shiwa byu pé lé gàm byí akô nghut ri.

²⁰ Yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsîng yu ashí kô nghut ri.

21 Haú má zô é bang gi, myiwe wuì eq zoshâng wuì lé a nghap lhôm é za, yuqgè baú ngo hkyîng kô bo ri.

Yesuq, Wuì Htoq Má Sô É Hkyô

Mrk 6:45-56; Yhn 6:15-21

22 Yesuq gi, haú shiwa byu pé lé byo ló nhang nyi é hkûn jáng, chángzô pé lé lhaí má wang ji nhâng mù, tû tap shut dap ló láng nhâng ri.

23 Shiwa byu pé lé nhang pyâm é htâng má, Yhang gi, kyûdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haú má nyi nyi ri.

24 Haú u lé, lhaí gi, gin-gau mai tsómra wê é jowò má jé é hkûn, laì tau mut é yanmai, wuìheng èq gyai yhang lo bat nhûn é hui zô ri.

25 Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri.

26 Haú mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taì garû akô nghut ri.

27 Haú jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

28 Haú hkûn, Petruq gi, "Yhumsîng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taì kat ri.

29 Haú jáng, Yesuq gi, "Lé lô aq." ga tû taì kat ri.

Haú mù, Petruq gi, lhaí mai gyó mù, wuì htoq mai Yesuq chyáng sô e ló ri.

30 Nghut kôhang, yhang gi, laidun htan é lé myang kat jáng, wú gyuq lui, wuì má nop ló nyî mù,

"Yhumsîng ê, ngo lé hkyi yù laq." ga wut garû kat ri.

³¹ Yesuq gi, radá dâm yhâng é loq lhâm kat luî, Petruq lé lâng zing to mù, "Lumjîng myit shau sù ê, nàng haî mù úng-âng lhê lú?" ga taî ri.

³² Yhangnhik, lhaî má wàng kôjáng, laidun le zîm byuq bê nghut ri.

³³ Hau htâng, haû lhaî má lúng tô é bang gi, Yhang lé paî gop mù, "Nàng gi, gè gè yhang, Garai Gasâng é Yhangzo nghut bê." ga taî akô nghut ri.

³⁴ Yhangmoq gi, gû dap ló kômù, Genesarat mau má jé wang ló bekô nghut ri.

³⁵ Haú mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akô. Haú mù, byu pé gi, nòhpyo hui bang lhungháng lé, shuí lé lô kômù,

³⁶ nòhpyo hui bang lé, Yhâng é bushi htâng má za lhang záng nhâng râ matú dúng tôngbán akô; Yhang lé záng é lhunghâng bang gi, lhoq gê byî é huî bekô nghut ri.

15

Sansêng É Hkyô Eq A Sansêng É Hkyô

Mrk 7:1-23

¹ Hau htâng má, Hparishe pé eq tarâ sará pé ram gi, Yerusalem wà mó mai Yesuq chyáng jé lé lô kômù,

² "Nàng é chángzô pé gi, haî mù luî, îchyí îwa pé é htungli lé a cháng kut akô lú? Yhangmoq gi, loq hí a chí é zang zô akô nghut ri." ga, lé taî akô.

³ Haû jáng, Yesuq tû taî é gi, "Nungmoq gi, haî mù, nungmoq é htungli é yanmai, Garai Gasâng é hkunmó lé a cháng kô é lú?"

⁴ Hkâsu mù gâ le, Garai Gasang gi, 'Nungmoq é înu îwa lé, hkungga keq.'[☆] ga le, 'Înu îwa lé, nhîng é sù ó yuq nghut kôle, sat pyâm é hui râ lêhê.'[☆] ga le, taî tô é nghut lêhê.

⁵ Nghut kôlhang, nungmoq taî é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi râ chyunghuq nghut lêhê ga taî é nghut jáng,

⁶ haú yuq gi, yhângwa lé hkungga nó a ra.' gâ akô nghut ri. Haú dông mai, nungmoq gi, nungmoq é htûnglî é yanmai, Garai Gasâng é mungdang lé he-ngik pyâm akô nghut ri.

⁷ Gegùn labyoq kut bang ê! Nungmoq eq séng luî, myiqhtoi Esai-aq htoî tô é dang gi, têng ri.

⁸ Myiqhtoi dang haú gi,
'Byù shí bang gi, nhut htoq mai za Ngo lé hkunggâ akô;
yhangmoq é myit nhiklhum gi, Ngò eq wê gâng nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri;

hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.'[☆]
gâ é nghut lêhê." gâ ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luî, "Gyô yù mù, sé lo keq.

¹¹ Nhut má wang lo é hái jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lêhê." ga taî ri.

☆ 15:4 Htoq Ló 20:12 ☆ 15:4 Htoq Ló 21:17 ☆ 15:9 Esai 29:13

12 Haú hkûn, haú chángzô pé gi, Yhâng chyáng lé lô kôluî, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lú?" ga myi kôjáng,

13 Yhang gi, "Mauhkûng htoq tsáng myhâng mâ é Ngá Wa a hô tô é agàm hkangmó gi, apûn eq roq nut pyâm é hui râ nghut lhê.

14 Yhangmoq é yanmai, myit hkâ-myô kó; yhang-moq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhûm é nghut le gi, í yuq é yhang dongkong má byit gyó kó râ za nghut lhê." ga tû tâi ri.

15 Haú hkûn, Petruq gi, "Ngamoq lé, dangtú hau é lichyúm tâi sân kyo laq." ga tái jáng,

16 Yesuq gi, "Nungmoq, ahkuî le haú-í yhang go nyi ashi kô luq?

17 Nhut má wang lo é hái jung le, wamdau hkaû má jé wang ló mù, gungdu mai dum htoq ló é nghut lhê.

18 Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri.

19 Hkâsu mù gâ le, myit nhiklhum mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaû é hkyô, a tengmán é saksé hkâm é hkyô, lumù gansang é hkyô pé nghut ri.

20 Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga tâi ri.

Hkanan Myiwe Myhí Rayuq É Lumj́ing Myit

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri.

²² Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsîng ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyîn nyi ri." ga taí garû ri.

²³ Nghut kôlhang, Yesuq gi, dang rahkun le a tû taí nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí haú lé ló nhang pyám aq; haí mù gá le, yhang gi, nga-nhûng é htâng má châng garû nyi ri." ga taí akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga taí ri.

²⁵ Haú hkûn, myiwe myhí haú gi, Yhâng é hí má lé mù hkyihput htuq luî, "Yhumsîng ê, ngo lé garúm yù laq ô!" ga taí ri.

²⁶ Yesuq gi, "Zô wui chyáng mâ é zoshuq lé yù mù, hkuí pé lé byi tsô é jung a nghut." ga tû taí jáng,

²⁷ myiwe myhí haú gi, "Yhumsîng ê, haú kúm nghut ri; nghut kôlhang, hkuí pé lháng, yhumsîng hpô é zohpoq mai gyó é zang cham zang htâng lé, zô akô mhaí." ga dum taí ri.

²⁸ Haú mù, Yesuq gi, "Myiwe zo ê, náng é lumj́ing myit gi, kô nyi ri! Nang dũng é hkyô lé gyo byi bê nghut lhê." ga tû taí ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô

Mrk 8:1-10

29 Yesuq gi, haú mai htoq ló luí, Galile nhông yàm má ê jé mù, bùm shut doq ló luí, ló zung nyi ri.

30 Haú hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotû myo myo lé shuí lé lô kômù, Yhâng é hkyî wang má lé nyhi to kô é nghut luí, Yhang gi, haú bang lé lhoq gê byî ri.

31 Haú shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

32 Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gû lé, Ngò a nhang kat naù." ga taí ri.

33 Haú hkûn, Yhâng é chángzô pé gi, "Isù é yoso má nhîng, byù shî myhò bang lé luq shoq byi tso râ zoshuq gi, hkarâ é wó râ lú?" ga myî akô.

34 Yhang gi, "Nungmoq, muk hkâ-myhó long wó akô lú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tû taí akô.

35 Haú mù, Yhang gi, byù hpûng lé, myigùng htoq má zùng nhang ri.

36 Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luí, haú chángzô pé lé byi jáng, yhangmoq gi, byù hpûng lé gàm byî akô nghut ri.

³⁷ Yhangmoq lhunglhâng bang zô gyî bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashî kô nghut ri.

³⁸ Haú hkûn zô é bang má, myiwe wuì eq zoshâng wuì lé a nghap lhôm é za, yuqgè wuì baú myi hkyîng yuq bo ri.

³⁹ Yesuq gi, byù hpûng lé ló nhang pyâm é htâng má, lhaí má wang ji mù, Magadan mau shut dap e ló bê nghut ri.

16

Kumlhá Dung Kô É Hkyô

Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng mã é kumlhá kut shit râ matú, dũng akô.

² Haú mù, Yhang gi, yhangmoq lé, "Nungmoq gi, myinhâng jé jáng, 'Mau hpong râ nghut lhê, hkâsu mù gâ le, mauhkûng ne ri.' ga le,

³ napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yû kô é nghut kôlhâng, shí ipyat lhê é kumlhá lé gi, a sê gam hkoq yû kô nghut ri.

⁴ Agè ashop é eq lhum a zuí é ipyat shî gi, limik kumlhá lé ho nyí akô; nghut kôlhâng, Yonaq é kumlhá mai lai luí, gotû haí le tũn shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pê É Múnchi

Mrk 8:14-21

⁵ Yhangmoq, nhông hé hpoq shut gû dap ló kô é hkûn, haû chángzô pé gi, muk yu chûng râ lé tô-myhî pyâm akô.

⁶ Haû hkûn, Yesuq gi, "Hparishe pé eq Saduke pê é múnchi lé, sidiq luî, koi pyâm nyî keq." ga, yhangmoq lé taî kat ri.

⁷ Yhangmoq gi, "Nga-nhúng, muk a yu chung é yanmai, haû su ga taî é nghut ri." ga luî, taî lhum bum akô nghut ri.

⁸ Yhangmoq haû su taî lhûm nyî kô é lé Yesuq sé jáng, yhangmoq lé, "Lumjínng myit shaû é bang ê, muk a bo é hkyô lé, haî mù taî lhûm nyî akô l hú?"

⁹ Ahkuî jé shoq, nungmoq gi, a sê gyo shi kó l hú? Muk ngo lông èq byù ngo hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le,

¹⁰ muk nyhit lông èq byu myi hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, nungmoq a myit bun kó l hú?

¹¹ Ngò gi, muk eq séng luî taî é a nghut é lé, nungmoq, hkâsu mù a sê gyo kô é l hú? Hparishe pé eq Saduke pê é múnchi lé koi pyám keq nghû taî é ru nghut lhê." ga taî ri.

¹² Haû hkûn sheq, Yhang taî é gi, muk má chung é múnchi lé koi pyám râ matú taî é a nghut e za, Hparishe pé eq Saduke pê é mhoqshit hkyô lé koi pyám râ matú taî é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô

Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haû Byu

Yhangzo gi, ó yuq nghut lhê ga, byu pé taí akô lhú?" ga myí ri.

14 Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taí akô." ga tû taí kôjáng,

15 Yhang gi, "Haú jáng, nungmoq gi, Ngo lé ó yuq nghut lhê nghu akô lhú?" ga, yhangmoq lé xoq myí ri.

16 Haú hkûn, Simun Petruq gi, "Nàng gi, rû dui nyi é Garai Gasâng é Yhangzo, Hkrisduq nghut ri." ga tû taí ri.

17 Haú mù, Yesuq tû taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tûn shit é gi, byù mai a nghut, mauhkûng htoq má nyi é Ngá é Îwa mai tûn shit é ru nghut lhê.

18 Ngò, nang lé taí lé, nàng gi, Petruq* nghut luí, luqgok shî má, Ngò, Ngá é noqkuq hpúng lé xuq to râ nghut mù, haú moming hkúmdong pé gi, hpúng haú lé wó ûng râ a nghut.

19 Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi râ nghut lhê." gâ ri.

20 Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûm kat ri.

* 16:18 Grik đông *Petruq* gâ é gi, luqgok lé gâ é nghut lhê.

Yesuq Gi, Yhang Shî Râ Lé Hí Te Tai Ê Hkyô
Mrk 8:31–9:1; Luk 9:22-27

²¹ Yesuq gi, Yhang Yerusalem wà mó má ló mù, suwún wuí, hkyangjong agyi pé eq tarâ sará pé é loq má, zing-rî é myo myo hui zo luî, sat pyâm é hui ra râ nghut kôle, sum nyí nghû râ buinyì má, lhoq toq yu é hui râ nghut é hkyô lé, haú hkûn mai, Yhâng é chángzô pé lé tai kyo hi ló bê nghut ri.

²² Haú mù, Petruq gi, Yhang lé rahkyam shut shuí htoq yû mù, "Yhumsîng ê, haú hkyô Náng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga tai ri.

²⁴ Hau htâng, Yhang gi, Yhâng é chángzô pé lé, "Ngá htâng cháng naú sù ó yuq nghut kôle, yhumsing gùng yhumsîng he-ngik pyám mù, yhumsing é tapzîng lé waq chûng luî, cháng ra râ nghut lhê.

²⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhâng, Ngá é yanmai, yhumsing é asak sùm pyâm é sù kúm gi, asak wó yû râ nghut lhê.

²⁶ Byù gi, mingkan gón lé wó sing to kôlhâng, yhumsing é asak woi-nyí sùm byuq é nghut le gi, yhang é matú, hai akyû bò râ lhú? Byù gi, yhumsing é asak woi-nyí lé, hai èq wó htaî yù râ lhú?

²⁷ Haú Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi,

yuq hkgmó lé, yhumsîng kut lai bê eq rajung za akyû byi râ nghut lhê.

²⁸Ngò, nungmoq lé teng za taí kôlé, ahkuî shí má yap to bang ra-am gi, haû Byu Yhangzo, Yhâng é mingdán eq jé lé lo é lé, a myang é za shî kó râ a nghut." ga taî ri.

17

Yesuq, Isâm Htaî Lo É Hkyô

Mrk 9:2-13; Luk 9:28-36

¹Hkyuq nyí laî htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhum má doq ló akô.

²Haû má, yhangmoq é myoq hí tê má, Yesuq é ihpyô isâm htaî byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri.

³Haû hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dâng nyo lhûm nyi akô.

⁴Haû mù, Petruq gi, Yesuq lé, "Yhumsîng ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum saí bá." ga taî ri.

⁵Petruq dang ru taî nyi ashî le, duqbó é mhut gi, yhangmoq lé htup zíng lô mù, mhut hkaû mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

⁶ Haû su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri.

⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luî, "Toq keq, hkâgyuq kó." ga taî ri.

⁸ Yhangmoq tu wú kat kô le, Yesuq mai lai luî, ó lé le a myàng lo kó nghut ri.

⁹ Bùm mai taû gyó lô kô é hkûn, Yesuq gi, "Ahkuî nungmoq myang é hkyô lé, haû Byu Yhangzo shi é mai lhoq dui toq yu é a hui hui gi, ó lé le hkâtaî kyo kó." ga, yhangmoq lé taî hkûm tô ri.

¹⁰ Haû jáng, chángzô pé gi, "Eliyaq hí lé ra râ nghut lhê ga, tarâ sará pé haî mù taî kô é lhú?" ga, Yesuq lé myî akô.

¹¹ Haú hkûn, Yesuq gi, "Eliyaq hí lé luî, lhunglhang lé hen lajâng to râ gâ é gi, têng lhê.

¹² Nghut kôlhang, Ngò, nungmoq lé taî kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haû eq rajung za, haû Byu Yhangzo le, yhangmoq é loq má hpuzo râ nghut lhê." ga tû taî ri.

¹³ Haú hkûn sheq, Yhang taî nyi é gi, Wui-myhup Sará Yohan eq sêng é hkyô nghut é lé, haû chángzô pé sê gyô akô nghut ri.

Nat Wang Júng Sû Lé Lhoq Gê Byî É Hkyô

Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taû jé lô kô é hkûn, byù rayuq gi, Yesuq chyáng lé jé mù, hkyihput htuaq luî,

15 "Yhumsîng ê, ngá é yuqzo lé shogyô yù laq; yhang gi, mhûngtuq tuq luî, gyai yhang jamjaû nyi ri. Myihkyóm má le, wuì má le, anum num lêng wàng wàng dut nyi ri.

16 Yhang lé, Náng é chángzô pê chyáng shuî ê kôlhang, yhangmoq a wó lhoq gê byi kó nghut ri." ga taî ri.

17 Haû mù, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuî lé lô keq." ga tû taî kat ri.

18 Yesuq gi, nat gang lé tân kat jáng, nat gang haû gi, yuqgè zo haú yuq chyáng mai htoq lô byuq bê nghut mù, haú hkûn jáng, yuqgè zo haû gi, ge byuq bê nghut ri.

19 Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haî mù, nat haú lé a wó hkat htoq é lhú?" ga, lé myi kôjáng,

20 Yhang gi, "Nungmoq é lumjîng myit shaû é yanmai nghut ri. Ngò, nungmoq lé teng za taí kôlé, nungmoq é lumjîng myit angshi cham í za hkâlháng bò kô é nghut le gi, bùm shî lé, 'Hé shut htot lô aq.' ga taî le, htot râ nghut lhê. Nungmoq a wó kut é haî lhang joq râ a nghut.

21 Shí jung gi, kyûdung é eq zoshuq gám é dông za a nghut jáng, a htoq lô é nghut lhê.*" ga dum tû taî ri.

22 Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haû Byu Yhangzo gi, byu pê é loq má ap pyâm é hui zo râ nghut lhê.

* 17:21 Chyúmbun shî gi, chyúmding myo myo má a bo é nghut lhê.

23 Haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má lhoq dui toq é hui râ nghut lhê." ga taí ri. Haú mù, haú chángzô pé gi, gyai yhang gyô yón nyî bekô nghut ri.

Noqkuq Yhûm Hkansê Kat É Hkyô

24 Yesuq eq Yhâng é chángzô pé gi, Kaperna-um wà má jé kô é hkún, noqkuq yhûm hkansê hkyuí bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lú?" ga myí akô.

25 Petruq gi, "Kat lhê." ga tû taí ri.

Hau htâng, Petruq yhúmhaú má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pê chyáng mai guq yu akô lú? Yhumsing byu pê chyáng mai lú? Haú a nghut jáng, góbâng chyáng mai lú? Nang, hkâsu wó myit lhê lú?" gâ ri.

26 Haú mù, Petruq gi, "Góbâng chyáng mai nghut ri." ga tû taí jáng, Yesuq gi, "Haú su nghut le gi, yhumsing byu pé gi, lut akô nghut ri.

27 Nghut kôlhang, yhangmoq é i-myt a ngón a dut kó sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé lâng há kat jáng, ngùn htingchap rachap lé myàng râ nghut lhê. Haú lé yù mù, Ngá é matú eq náng é matú, yhangmoq lé ló byi aq." ga taí ri.

18

Kô Dik Sû Gi, Ó Yuq Nghut Lhê Lú?

Mrk 9:33-37, 42-48; Luk 9:46-48; 17:1-2

¹ Haú hkûn, haú chángzô pé gi, Yesuq chyáng lé jé kômù, "Mauhkûng mingdán má, kô dik sù gi, ó yuq nghut lhê lhú?" ga myí akô.

² Yesuq gi, zoshâng zo rayuq lé wut yù mù, yhangmoq é gung gûng má shap to luí,

³ taí é gi, "Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuî su dut kô é za a nghut jáng, mauhkûng mingdán má hkâ-nhám le wó wâng kô râ a nghut.

⁴ Haú mù, zoshâng zo shí yuq su, yhumsing é i-myit wó lhoq nyhum é sù ó yuq nghut kôle, mauhkûng mingdán má, kô dik sù nghut ri.

⁵ Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê.

⁶ Nghut kôlhang, Ngo lé lumjìng é zoshâng wuì mâ é rayuq yuq lé, mara kut shut nhang é sù gi, yhâng é lingzing má luqluí long mó tuí hut byi luí, nik é wuimau má, dú hkyô pyâm é huí é nghut le gi, yhâng é matú je gè râ nghut lhê.

⁷ Haú mingkan gi, byu pé lé mara kut shut nhâng jang joq é yanmai, dingnyé wó ri. Haú mara kut shut nhâng hkyô gi, htoq lugù bê; nghut kôlhang, haú lé lhoq htoq sù gi, dingnyé wó ri.

⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyí hkúm loq hkúm gû dú hkyô pyâm é huí râ htoq má, hkyí loq a hkúm é za, asak wó yu é nghut le gi, náng é matú je ge ri.

⁹ Náng é myoqjí èq, nang lé mara kut shut nhang é nghut le gi, haú lé lap choq yù mù, dú pyám aq; myoqjí í jí dap gû ngaraí myi má dú hkyô pyâm

é hui râ htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shî sù é zoshâng zo wuî mâ é rayuq lé lháng a wú tiq râ matú, sidiq nyi keq. Hkâsu mù gâ le, Ngò, nungmoq lé taí kôlé, mauhkûng mâ é yhangmoq é maumang lagyô pé gi, mauhkûng htoq mâ é Ngá Wâ é myoqdong lé, hkâ-nhám le myang nyi akô.

¹¹ (Hkâsu mù gâ le, haû Byu Yhangzo gi, byuq byuq bê bang lé hkyi yù râ matú, jé lé é nghut lhê.)*

¹² Byù rayuq gi, sau rashô du wó é nghû sháng, sau haú gû mâ é radu byuq byuq é nghut jáng, haú gaú xe gaú du lé, bùm pé má nyhi pyâm to luî, byuq byuq é sau lé a châng ho é nyi râ lhú? Haú lé, nungmoq hkâsu wó myit ngam akô lhú?

¹³ Ngò, nungmoq lé teng za taí kôlé, yhang gi, haû byuq byuq é sau haú lé myang ho é hkûn, a lám byuq é sau gaú xe gaú dû é matú gabú é htoq má, haú dû matú je riyhang gabú ri.

¹⁴ Haû eq rajung za, mauhkûng htoq mâ é nungmoq é Îwa gi, shî tiq bang mâ é rayuq htên byoq byuq râ lé lháng, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tân shit aq. Yhang,

* **18:11** Bun zo shí gi, chyúmding myo myo má a bo é nghut lhê.

náng é dang lé gyô é nghut jáng, nàng gi, gumang rayuq dum wó bê nghut ri.

¹⁶ Nghut kôhang, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lôm jáng, wó lhoq teng sháng gaq.' ✧
gâ tô é eq rajung za, nàng, gotû byù ra-í yuq lé shuí chûng aq.

¹⁷ Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpûng é dang lé le a gyô é nghut jáng, yhang lé, a lumjínng é byù rayuq dông le, kang guq sù rayuq dông le sôn pyám aq.

¹⁸ Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkûng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi râ nghut lhê.

¹⁹ Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôhang, mauhkûng htoq mâ é Ngá Wa gi, haú nhik lé gyo byi râ nghut lhê.

²⁰ Hkâsu mù gâ le, Ngá myîng lé lang luí, í yuq sum yuq zup zîng é jang hkâmá nghut kôhang, haú bâng é gyoro má Ngò nyi lhê." gâ ri.

Shogyo Nihkmyin A Sê É Jùn Hpô É Dangtú

²¹ Haú hkûn, Petruq gi, Yesuq chyáng huí ê mù, "Yhumsîng ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra râ lhú? Nyhit dâm jé shoq hkyut byi ra râ lhí?" ga myí ri.

22 Haû jáng, Yesuq tù taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lhê.

23 Mauhkûng mingdán gi, yhumsing é dui-nhâng zoshâng wui é jihpán lé jep nau é hkohkâm rayuq eq du ri.

24 Yhang gi, jihpán lé jep hi ló é u lé, yhâng chyáng ngùn wan myo myo chyîn dap to sú lé shuí lé lo akô.

25 Haû yhumsîng hpó gi, haú yuq chyîn a wó xap é yanmai, chyîn wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ûng pyám râ hkunmó hkyô kat ri.

26 Haû mù, dui-nhâng zoshâng haú yuq gi, yhâng é hí má hkyihput htuq luî, 'Ngo lé myit hîng byi shi laq; banshoq lé, ngò xap râ.' ga dîng tôngbán ri.

27 Haû dui-nhâng zôshang é yhumsîng hpó gi, haú yuq lé wú shogyo luî, chyîn banshoq lhut pyám byi mù, nhang kat ri.

28 Nghut kôlhang, dui-nhâng zoshâng haû gi, htoq ló mù, yhang lé, denari[†] rashô chyîn dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyîn hân xap aq!' ga taí ri.

29 Haú hkûn, yhâng é luzúm dui-nhâng zoshâng haû gi, yhâng é hí má hkyihput htuq luî, 'Ngo lé myit hîng byi shi laq; ngò xap râ.' ga dîng tôngbán ri.

[†] 18:28 Denari rachap gi, ra-nyí lhê é byù rayuq é zuihpau eq wui ri.

³⁰ Nghut kôlhang, yhang gi, a gyo byî e za, yhâng é chyîn dum wó xap é hkûn jé shoq, haú yuq lé htóng hkyô pyám nhâng ri.

³¹ Gotû dui-nhâng zoshâng wuì gi, haú hkyô lé myàng kôjáng, i-myit wú nô kôluì, yhangmoq é yhumsîng hpó lé, haú hkyô banshoq ló taí kyô akô.

³² Haú mù, haú yhumsîng hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng ê, nàng, ngo lé dúng tôngbân é yanmai, nàng, ngo lé dap é chyîn banshoq lé, ngò lhut pyám byi bê nghut lhê mhaí.

³³ Haú su é nhîng, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut lú?' ga taí luì,

³⁴ yhang gi, nhikjum yo mù, yhâng é chyîn ban xap é hkûn jé shoq, jamjau hui zo râ matú, yhang lé, htóng suwún pê chyáng ap byî pyám bê nghut ri.

³⁵ Nungmoq é gumang wuì lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le, nungmoq lé haú đông kut râ nghut lhê." gâ ri.

19

Myi Làng Gâng É Hkyô

Mrk 10:1-12

¹ Yesuq gi, mhoqshit é dang haú pé lé ban taí jáng, Galile mau mai htoq ló mù, Yodan làng tû tap mâ é Yuda mau má ê jé ri.

² Byù moq mó gi, Yhâng htâng cháng kô é nghut mù, Yhang gi, haú bang mâ é nõhpyo hui bang lé, haú má lhoq gê byî ri.

³ Haú hkûn, Hparishe pé ra-am gi, Yhâng chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yhangmyi lé lhoq kang pyâm le, tarâ wang lhê lhú?" ga myî akô.

⁴ Haû jáng, Yhang tû taí é gi, "A-nham sâng-hi lé, Hpân Sû, 'byu hpan é hkûn, yuqgè eq myiwe lé hpan é nghut lhê.'[☆]

⁵ 'Hau é yanmai, yuqgè gi, yhumsing é înu îwâ chyáng mai htoq luî, yhangmyi eq rahá rading ralhum za kut nyî mù, yhangnhik gi, gungsho ralhum za dut byuq kó râ nghut lhê.'[☆] ga kê tô é lé, nungmoq a nghap wú kó lhú?

⁶ Haû mù luî, yhangnhik gi, í yuq a nghut lô e za, rayuq za dut bê nghut ri. Haû mù luî, Garai Gasang lhoq tsûm tô é lé, byù gi, a lhoq kang sháng gaq." gâ ri.

⁷ Haú hkûn, yhangmoq gi, "Haû lé nhîng, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, haî mù, Mosheq, hkunmó hkyô tô lhê lhú?" ga, Yhang lé dum taú myî akô.

⁸ Haû mù, Yesuq gi, "A-nham sâng-hi mai gi, haú dông a nghut. Nghut kôlhang, nungmoq é myit nhiklum htân kô é yanmai, nungmoq é yhangmyî pé lé lhoq kang râ ahkáng, Mosheq byî tô é ru nghut lhê.

⁹ Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kang pyâm mù, myiwe gotû dum hâng yu é sù ó yuq nghut

kôle, su-myi lú é sù dut bê." ga, yhangmoq lé dum tû taî ri.

¹⁰ Haú hkûn, haú chángzô pé gi, "Myi làng hkyô má haú đông ru nghut le gi, a yu le lhang je ge nyo ri." ga taî akô.

¹¹ Haú mù, Yesuq gi, "Yuq hkangmó gi, dang haú lé wó hap yu é a nghut, wó hkâm râ jeju wó é bang za sheq, wó hap yu é nghut lê.

¹² Byù ra-am gi, înu unghkaû mai yhang, yuqgè a jé gû hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jâng, mauhkûng mingdán é matú, yuqgè a jé râ đông kut yu pyâm akô nghut ri. Shí hkyô lé wó hap yù sù gi, hap yù sháng gaq." ga dum taî ri.

Zoshâng Wui Eq Yesuq

Mrk 10:13-16; Luk 18:15-17

¹³ Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haú chángzô pé kúm gi, haú shuí lé lô bang lé lhom tân hkûm akô nghut ri.

¹⁴ Nghut kôlhang, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, haú sù é bâng é mingdán ru nghut lê." ga taî kat ri.

¹⁵ Yhang gi, zoshâng wui htoq má loq ke shimân byi mù, haú jowò mai htoq ló bê nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

16 Byù rayuq gi, Yesuq chyáng lé jé mù, "Sarà ê, ahtum abyuq é asak wó yû râ matú, ge é muzó haí kut ra râ l hú?" ga myî ri.

17 Haû jáng, Yesuq gi, "Ge é hkyô eq séng luî, haí mù Ngo lé myî lê l hú? Ge é Sû gi, rayuq za nyi lê. Nàng, asak dui é má wàng nau é nghut le gi, jep é tarâ pé lé cháng aq." ga tû taî ri.

18 Haú yuq gi, "Hká gû lé l hú?" ga dum myi jáng, Yesuq gi, "Byù hkâsat, su-myi hkâlú, hkâhkau, a teng a mán é saksé hkâhkám,

19 nángnu nánnga lé hkungga aq, ☆ ga le, 'náng gûng lé nàng chyitdap e su, náng é chyangnâm mâ é bang lé le chyitdap aq. ☆ ga le bo tô ri." ga taî kat ri.

20 Haú hkûn, zorâm hpó haû gi, "Haú pé banshoq lé, ngò cháng bê nghut lê; haí kut râ ashî l hú?" ga dum taû myî ri.

21 Yesuq gi, "Nàng, gumjup sù dut nau le gi, ló mù, nàng wó é sutzè pé lé ûng pyám luî, myùng bang lé byî pyám aq; haû jáng, nàng, mauhkûng htoq má sutzè wó râ nghut lê; haû mù, Ngá htâng lé cháng aq." ga tû taî ri.

22 Zorâm hpó haû gi, sutzè gyai wó sù nghut é yanmai, dang haú lé wó gyo jáng, gyai yhang myit a gón é èq ló byuq bê nghut ri.

23 Hau htâng, Yesuq gi, Yhâng é chángzô pé lé, "Ngò, nungmoq lé teng za taí kôlé, sutzè wó bang gi, mauhkûng mingdán wó wâng râ gyai yhang wuî ri.

24 Hau htoq agó, Ngò, nungmoq lé taí kôlé, sutzè wó sù rayuq, Garai Gasâng é mingdán má wó wâng

râ htoq, gola-uq radu âpno mai wó wang lai râ gi, je lui râ nghut lhê." ga taî ri.

²⁵ Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lhê lú?" ga Yhang lé myî akô nghut ri.

²⁶ Haú hkûn, Yesuq gi, yhangmoq lé wú kat mù, "Haú hkyô lé byù mai gi, wó kut râ a nghut; nghut kôlhang, Garai Gasang gi, lhunglháng lé wó kut é Sû nghut lhê." ga taî ri.

²⁷ Haú hkûn, Petruq gi, Yhang lé, "Ngamoq gi, wó é gû lhunglháng lé tô pyâm to lui, Náng htâng cháng bê nghut lhê. Ngamoq, haî wá wó râ nghut lhê lú?" ga myî kat ri.

²⁸ Haû mù, Yesuq tù taî é gi, "Ngò, nungmoq lé teng za taî kôlé, lhunglháng lé asik dum saî dut nhang é má, haû Byu Yhangzo gi, Yhâng é hpung-wup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhûm htoq má zùng to kômù, Israe-laq amyû raxe í hú lé jéyáng kó râ nghut lhê.

²⁹ Ngá é yanmai, yhumsing é yhûm, nhiktâng wuì, înu îwa, zo dù wuì eq yò pé rajung jung lé tô pyâm tô é sù ó yuq nghut kôle, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê.

³⁰ Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyî bang yuq gi, hí bekô râ nghut lhê.

20

Tsibiyiq Hkyâm Mû Zui Bang Lé Dangtú Yu É Hkyô

¹ Hkâsu mù gâ le, mauhkûng mingdán gi, yhumsing é tsibiyiq hkyâm má mù zui nhâng râ langchyáng ê lûng râ ga, napsûn noq le htoq e ló é hkyâm yhumsing eq du ri.

² Yhang gi, ra-nyí é matú denari rachap byi râ dông, haú bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

³ Napkyó gau hkyíng* kô má, yhang gi, htoq e ló le, hai mù le a kut é za, gài má yap tô é bang ra-am lé ê myang ri.

⁴ Haú mù, yhang gi, haú bang lé, 'Nungmoq le, ngá é hkyâm má mù ê zui keq; byi âng é ahpau, ngò, nungmoq lé byi râ nghut lhê.' ga tái jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myinhtâng sum hkyíng kô má le, dum htoq ê mù, haú eq rajung za langchyâng pé ê lung kat ri.

⁶ Myinhtâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akô lú?' ga myi jáng,

⁷ haú bang gi, 'Ngamoq lé, ó yuq eq le a lûng kô é yanmai nghut lhê.' ga tû tái akô.

Haú hkûn, yhang gi, 'Nungmoq le, ngá é hkyâm má mù ê zui keq.' ga tái ri.

⁸ Myinhtâng jé jáng, tsibiyiq hkyâm yhumsing gi, yhâng é mù shuí u sù lé, 'Haú langchyâng pé lé ji yù mù, je htâng má lung yu é bang mai hí luí, sâng-hi

* **20:3** Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hí lhê.

lung yu é bang jé shoq, mù zui hpau byi aq.' ga taí ri.

⁹ Myinhtâng ngo hkyíng má mù wàng bang le, denari rachap chap wó yu bum akô.

¹⁰ Haû mù, je hí má mù wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri.

¹¹ Yhangmoq gi, haú myhó za wó yu bùm kô é yanmai, haú hkyâm yhumsíng lé,

¹² 'Shí bang gi, je htâng má mù lé wâng mù, nayí rahkum za mù zui kôlhang, nàng gi, ra-nyí buigyùm chap bui htân yò má mù zui é bang ngamoq eq rajung za byí ri.' ga mara hûn dang taí akô.

¹³ Nghut kôlhang, haú hkyâm yhumsíng gi, haú bang mâ é rayuq lé, 'Buinùm hpó ê, ngò, nang lé a tará é đông kut é a nghut. Denari rachap byi râ nghû, nàng eq ngò myit huí to bê a nghut lú?

¹⁴ Nàng wó âng é lé yu chûng mù, ló aq. Je htâng má mù lé wang é sù lé le, nang lé byí é myhó, ngò byí nau ri.

¹⁵ Ngá é ngùn lé, ngò kut nau é su a ge kut lú? Ngò, ge é kut le, nàng manôn ri lú?' ga taí ri.

¹⁶ Haû mù luí, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó râ nghut lê." gâ ri.

*Yesuq Gi, Yhang Shí Râ Hkyô Lé Dum Taí Ri
Mrk 10:32-34; Luk 18:31-34*

¹⁷ Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotû kut wut yù mù,

18 "Nga-nhúng gi, Yerusalem wà mó shut doq ló nyi lhê; haû Byu Yhangzo gi, hkyangjong agyi pé eq tarâ sará pé é loq má ap byî pyâm é hui râ nghut lhê; haû bang gi, Yhang lé, shî râ mara byi kó râ nghut é htoq agó,

19 jóng pyâm é, nhuq bat é eq tapzîng má jén sat pyâm é hui râ matú, haû tûngbaù pé é loq má ap pyám kó râ nghut lhê. Nghut kôhang, Yhang gi, sum nyí nghû râ buinyì má, lhoq dui toq é dum hui râ nghut lhê." ga taî ri.

Zô Nhik Matú Ínu Èq Dung Byî É Hkyô

Mrk 10:35-45

20 Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômù, rajung dung râ matú, Yesuq é hí má hkyihput htug nyi ri.

21 Haû mù, Yesuq gi, "Nàng, haî ô nau ri lú?" ga yhang lé myi jáng, yhang gi, "Náng é mingdán má, shî ngá zô nhiktâng lé, Náng é loqyò hkyam má rayuq, loqpaî hkyam má rayuq kut, zùng râ ahkáng byi laq." ga taî ri.

22 Haû hkùn, Yesuq gi, "Nungnhik haî dîng nyi é lé, nungnhik a sé kó nghut ri. Ngò shuq râ góm† lé, nungnhik wó shuq kó râ lú?" ga myi jáng, yhangnhik tâng gi, "Wó shuq lhê." ga tû taî akó nghut ri.

23 Haû mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôhang, Ngá é loqyò, loqpaî hkyam má zùng râ ahkáng lé gi, Ngò byî jung a nghut. Jowò haû pé

† 20:22 Góm gâ é gi, Yesuq, jamjau hui râ hkyô eq shî râ hkyô lé, tai nau é nghut lhê.

gi, Ngá Wa hen to byi bâng é matú za ru nghut lhê." ga taí ri.

²⁴ Gotû chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri.

²⁵ Haú mù, Yesuq gi, yhangmoq banshoq bang lé wut tsing yù luí, "Tungbaù pé lé uphkan é ga bang gi, tungbaù pé lé up zô nyí kô é hkyô lé le, haú eq rajung za, yhangmoq é ming up suwún wuî le, yhumsing é ahkáng ayá lé chûng mù, up zô nyí kô é hkyô lé le, nungmoq sê lhê.

²⁶ Nungmoq chyáng gi, haú su a dut kó sháng gaq; haú Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyám râ matú sheq, jé lé é ru nghut é su,

²⁷ nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê.

²⁸ Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra râ nghut lhê." ga taí ri.

*Myoqjit Í Yuq Myoq Dum Myang É Hkyô
Mrk 10:46-52; Luk 18:35-43*

²⁹ Yesuq eq Yhâng é chángzô pé gi, Yerihko myuq mai htoq ló nyí kô é hkûn, byù moq mó gi, yhangmoq é htâng má châng e ló bum akô.

³⁰ Haú hkyô yàm má zung tô é myoqjit í yuq gi, Yesuq lai ló nyí é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garû kat akô nghut ri.

³¹ Byù moq mó gi, yhangnhik zîm byuq râ matú tân hkúm kôlhang, yhangnhik gi, "Dawiq é Yhangzo, Yhumsîng ê, ngá-nhik lé shogyô yù laq ô!" ga, je riyhang htê mó eq wut garû kat akô nghut ri.

³² Haû mù, Yesuq gi, yap kat mù, "Ngò, nungnhik lé haî kut byi râ ô nau akô l hú?" ga, yhangnhik lé wut myî kat ri.

³³ Haú hkûn, yhangnhik gi, "Yhumsîng ê, ngá-nhik myoq myàng nau ri." ga tû taî akô.

³⁴ Yesuq gi, yhangnhik lé wú shogyo luî, yhangnhik é myoqjí má ê záng byî ri. Haú hkûn jáng, yhangnhik gi, myoq wó myâng kômù, Yhâng htâng cháng bekô nghut ri.

21

*Yesuq, Yerusalem Wà Mó Má Wang E Ló É Hkyô
Mrk 11:1-11; Luk 19:28-38; Yhn 12:12-19*

¹ Yesuq eq Yhâng é chángzô pé gi, Yerusalem wà mó eq chyâng lo nyî kô é hkûn, Tsanlun Bùm mâ é Bethpage wà má jé ló kôjáng, Yesuq gi, chángzo í yuq lé,

² "Nungnhik, hí mâ é wà má ê keq; wà haú má, logúng zîng radu lé, logúng zo eq rahá tuî to lánng é lé, è myâng kó râ nghut lhê; haú lé hpyi yù mù, Ngá chyáng she lò keq.

³ Byù rayuq yuq, nungnhik lé rajung jung gâ lò jáng, 'Shî í du lé, haû Yhumsîng chûng râ ri.' gâ nghû tû taî keq; haû jáng, yhang, radá dâm nhâng byi râ nghut lhê." ga Yesuq taî luî, nhang kat ri.

⁴ Haû gi, myiqhtoi dang lhoq dik râ matú dut lo é nghut ri.

⁵ Myiqhtoi dang haû gi,

"Zi-un byizo* lé, shî su nghû keq; 'Wú aq, náng é
 hkohkâm gi,
 nú-nhâm é myit eq logúng htoq má ji mù, nghut bê,
 logúng zo htoq má ji mù, náng chyáng lé lô
 bê nghut ri."*✧

gâ ri.

⁶ Haû chángzô nhik gi, e ló mù, Yesuq taî kat é eq
 rajung za ê kut bekô nghut ri.

⁷ Yhangnhik gi, logúng me lé she lò mù, yhangn-
 hik é buhíng pé lé, haû logúng mê é htoq má ke byi
 kôjáng, Yesuq gi, doq jî ri.

⁸ Byù moq mó mâ é myo myo gi, yhangmoq é
 buhíng lé, hkyô má hkyut hkang byî akô; ra-am gi,
 mhandíng pé lé zân hkyô yù mù, hkyô má hkang
 byî akô nghut ri.

⁹ Yhâng é hí má htâng má châng sô nyi bum é
 bang gi,

"Dawiq é Yhangzo gi, hosana† nghut nyî sháng gaq
 ô!"

"Haû Yhumsing é myìng mai jé lé lô Sû gi, hkungsô
 wó nyî sháng gaq ô!"*✧

"Htoq tsáng myhâng má, hosana nghut nyî sháng
 gaq ô!"

ga luî, taî garû bum akô nghut ri.

¹⁰ Yesuq, Yerusalem wà mó má wang ló é hkûn,
 rawà gón é bang gi, gabyông lo bùm kômù, "Shí yuq
 gi, ó wá nghut lhê lhà?" ga luî, myi lhûm bum akô.

* **21:5** Zi-un byizo gâ é lichyúm gi, Yerusalem byu pé gâ é nghut lhê.

✧ **21:5** Zhk 9:9 † **21:9** Hebre dang má, hosana gâ é gi, "ahkuí hkyi
 yù laq" gâ é nghut lhê. Nghut kôlhang, bun zo 9 má gi, hkya-on dang
 dông chung é nghut lhê. ✧ **21:9** Hkya-on 118:26

11 Haú hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taî akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

12 Yesuq gi, noqkuq yhûm má wang ê mù, haú mâ é zè ung zè wuì kut nyi é bang banshoq lé, hkat htoq pyám luî, ngùn htaí zo bâng é siboî pé eq hpûngkyui ung zo bâng é tanghkuq pé lé, tu mhuc pyám byî ri.

13 Haú hkûn, Yhang gi, "'Ngá yhûm gi, kyûdung yhûm ga râ nghut lhê.'☆ ga kâ to kôlhang, nungmoq gi, jowò shî lé 'damaq hkyûng'☆ kut nyi akô." ga, yhangmoq lé taî ri.

14 Yesuq, noqkuq yhûm má nyi tô é hkûn, my-oqjit bang eq hkyî hten bang Yhâng chyáng lé lô kômù, Yhang gi, haú bang lé lhom lhoq gê byî ri.

15 Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhûm má zoshâng wuì garû nyi bùm kô é lé le, myàng kôjáng, wú nhik-yô bum akô nghut ri.

16 Haú mù, yhangmoq gi, "Zoshâng shí bang haî taî nyi kô é lé, Nàng wó gyô lhê lhu?" ga, Yesuq lé myi kôjáng, Yhang gi, "Wó gyô ri. Nungmoq gi, 'Zoshâng wuì eq nyheqnú pé é nhut mai hkya-on kungtôn râ matú, nàng lajâng to bê nghut ri.'☆

ga kê tô é lé, Chyúmdang má a nghap wú kó lú?" ga yhangmoq lé tâi ri.

¹⁷ Hau htâng má, Yhang gi, haú bang lé nyhi to luí, wà hkaú mai htoq ló mù, Behtani wà má é jé luí, haú myîn, haú má bíng yu ri.

Maihpáng Gâm Nyhuí Kyuq Shi Byuq É Hkyô
Mrk 11:12-14, 20-24

¹⁸ Yhang gi, htang napkyó noq le, Yerusalem wà mó shut dum taú ló é hkûn, hkyô má zòmút hui bê nghut ri.

¹⁹ Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, "Nàng má, hkâ-nhám le ashi a zui sháng gaq." ga tái kat ri. Haú hkûn jáng, agàm haú gi, nyhuí kyuq shi ló byuq bê nghut ri.

²⁰ Haú chángzô pé gi, haú lé myàng kôjáng, maú byuq kômù, "Maihpáng gâm shí gi, haí mù haú-í hân nyhuí kyuq shi ló lhê lhà?" ga myí akô.

²¹ Yesuq gi, "Ngò, nungmoq lé teng za tái kôlé, nungmoq, úng-âng é myit a bo é za, lumjíng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shí lé, 'Htot mù, wuimau má ló gyó wâng aq.' ga tái jáng, tái é eq rajung za dut râ nghut lhê.

²² Nungmoq, lumjíng myit èq dung kô é nghut jáng, haí dúng le le wó yú kó râ nghut lhê." ga tú tái ri.

Yesuq É Ahkáng Ayá Lé Myí Chyam É Hkyô
Mrk 11:27-33; Lúk 20:1-8

²³ Yesuq gi, noqkuq yhúm wàng hkaú má wang ê mù, mhoqshit nyi é hkûn, hkyangjong agyi pé eq

mingbyu é suwún wuê gi, Yhâng chyáng lé jé kômù, "Hai ahko ahkâng èq, Nàng, shí pé lé kut nyi lê lú? Ahko ahkáng shî, Nang lé ó yuq byî é lú?" ga myî akô.

²⁴ Haú hkûn, Yesuq gi, "Ngò le, nungmoq lé rajung myî wú kôlé, nungmoq wó tû taí kô é nghut jáng, hai ahko ahkâng èq, Ngò, shí pé kut é hkyô lé taí kyo râ nghut lê.

²⁵ Yohan byî é bapisma gi, ó yuq é ahko ahkáng mai nghut lê lú? Mauhkûng mai lú? A nghut jáng, byu chyáng mai lú?" ga taú myî kat ri.

Haú hkûn, yhangmoq, chôm hpyé lhum kô é gi, "'Mauhkûng mai nghut lê.' nghû, nga-nhúng taí jáng le, 'Haú nghut le nhîng, haí mù, yhang lé a lumjîng kô é lú?' ga râ nghut;

²⁶ 'Byu chyáng mai nghut lê.' nghû jáng le, yhangmoq lhunglhâng bang gi, Yohan lé, myiqhtoi rayuq ga lumjîng bûm kô é nghut lê yanmai, haú bang lé, nga-nhúng gyuq râ lê nghut." gâ akô.

²⁷ Haú mù, yhangmoq gi, Yesuq lé, "Ngamoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtú Yu É Hkyô

²⁸ Yesuq xoq taí é gi, "Nungmoq hkâsu wó myit akô lú? Byù rayuq gi, yuqzo í yuq wó ri. Yhang gi, ko sù yuq chyáng é mù, 'Ngá zo è, nàng, hkû-nyí tsibyiq hkyâm má mù é zui aq.' ga taí jáng,

²⁹ yuqzo haú gi, 'Ngò a kâm ê.' ga tû taí ri; nghut kôlhâng, htâng má, yhang gi, myit dum lhîng mù, ê bê nghut ri.

30 Hau htâng, yhângwa gi, yhang zo tiq sù yuq chyáng ê mù, rajung za ga ê dum tái jáng, yuqzo haû gi, 'Ê râ, âwa!' ga yín yû kôlhang, a ê kut ri.

31 Haú nhiktâng mâ é hká yuq sheq, yhângwa ô nau é hkyô lé kut sù nghut ri lhú?" gâ ri.

Haú hkûn, yhangmoq gi, "Ko sù nghut ri." ga tû tái akô.

Haû mù, Yesuq gi, yhangmoq lé, "Ngò, nungmoq lé teng za tái kôlé, kang guq bang eq shiwa myhî pé gi, Garai Gasâng é mingdán má, nungmoq a wàng shimá, wang ló nyi bùm kó râ nghut lhê.

32 Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shit kôlhang, nungmoq gi, yhang lé a jing kut akô nghut ri; nghut kôlhang, haû kang guq bang eq shiwa myhî pé gi, yhâng dang lé jing akô nghut ri. Nungmoq gi, haú hkyô lé myang é nghut kôlhang, myit a lhing kô é htoq agó, yhang lé a lumjing shi kó nghut ri.

*Tsibiyiq Hkyâm Saí Bang Lé Dangtú Yu É Hkyô
Mrk 12:1-12; Luk 20:9-19*

33 Gotû dangtú lé gyô wú shi keq; hkyâm yhumsing rayuq gi, tsibiyiq hkyâm ralhum saí to mù, lhinghkyuq kyâm to luí, tsibiyiq wing pyik htoq râ donghkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri.

34 Kyôshu yoq jé jáng, yhang gi, yhang eq sêng é tsibiyiq shi ê yû râ matú, yhâng é dui-nhâng zoshâng wuì lé, haú hkyâm saí zo bâng chyáng nhang kat ri.

35 Haû hkyâm saí zo bang gi, dui-nhâng zoshâng wuì lé, lhom chyup yû kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luggok èq lhom dú sat pyám, kut akô nghut ri.

36 Hau htâng má, yhang gi, hî dam lê htoq je myo shoq gotû dui-nhâng zoshâng wuì lé dum nhang kat le le, haû hkyâm saí zo bang gi, hí lê bang lé su lhom dum kut akô nghut ri.

37 Ló htáng má, yhang gi, 'Ngá zo lé gi, yhangmoq lhom hkungga kó râ nghut lê.' ga, yhang zo lé, haú bâng chyáng nhang kat ri.

38 Nghut kôlhang, haû hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yû râ sù nghut lê; lé keq, yhang lé sat pyám mù, yhâng é silí wunlí lé yu pyám byi sháng.' ga, rayuq eq rayuq taí lhûm bum akô nghut ri.

39 Haû mù, yhangmoq gi, yhang lé, chyup yû luí, hkyâm shinggan shut dú htoq kômù, sat pyám bekô nghut ri.

40 Haû mù luí, tsibiyiq hkyâm yhumsîng lé jé é hkûn lé, haû hkyâm saí zo bang lé hkâsu kut nhô ngam akô lhú?" ga Yesuq myî ri.

41 Haú hkûn, haû hkyangjong agyi pé eq suwún wuì gi, "Haû agè ashop bang lé gi, agè ashop é dông sat pyám râ nghut lê. Haû tsibiyiq hkyâm lé gi, kyô shu yoq má, yhâng é gambùm lé byi râ bang lé, htot ngho byî pyám râ nghut lê." ga, tú taí akô nghut ri.

42 Haû jáng, Yesuq dum taí é gi, "Chyúmdang má, 'Yhûm saí bâng èq hkyin htoq pyâm é luggok gi, htungchyûn mâ é ahkyak dik é luggok dut bê.

Shí hkyô gi, haû Yhumsîng kut é nghut luî, nga-
nhûng é myoq hí má mauho dut bê nghut
ri.†

ga bo tô é lé, nungmoq a nghap wú kó lúh?

⁴³ Haû mù, Ngò, nungmoq lé taí kôlé, Garai
Gasâng é mingdán lé, nungmoq chyáng mai yù mù,
hau é ashi wó zui râ byuhú lé byî pyám râ nghut
lhê.

⁴⁴ Luqgok haú má gyó záng é sù gi, gyuî gyop
byuq râ nghut lhê. Luqgok hau eq gyó nhê záng é
sù le, nhê pyeq pyâm é hui râ nghut lhê." gâ ri.

⁴⁵ Hkyangjong agyi pé eq Hparishe pé gi, haû
Yesuq taí é dangtú pé lé wó gyo kôjáng, yhangmoq
lé taí nyi é hkyô lé, sê gyô akô nghut ri.

⁴⁶ Haû mù, yhangmoq gi, Yhang lé chyup yû râ
hkyô ho nyi akô; nghut kôlhang, byu pé gi, Yhang
lé, myiqhtoi rayuq ga myit lum to kô é yanmai,
yhangmoq gi, haú bang lé gyuq akô nghut ri.

22

Myiháng Poî Dangtú Pé

Luk 14:15-24

¹ Yesuq, dangtú pé dông yhangmoq lé dum taí é
gi,

² "Mauhkûng mingdán gi, yhumsing yhangzô é
matú myiháng poî hen lajáng to byî é hkohkâm
rayuq eq du ri.

³ Hkohkâm hpó haû gi, yhang ji tô é bang, haû
poî má lé lô râ matú, yhâng é dui-nhâng zoshâng
wù lé ê tsing taí nhang ri; nghut kôlhang, haú bang
gi, a lé kut akô nghut ri.

† 21:42 Hkya-on 118:22-23

4 Hau htâng má, yhang gi, gotû dui-nhâng zoshâng wuì lé, 'Ngò haì le hen to bê; ngá é no eq xu-myum é gau-nyhaú pé lé sat mù, jung hkgangmó rì rì nghut to bê. Myiháng poì má lé lò keq hkoi nghû, haû ji tô é bang lé ê taì keq.' ga pyîng luî, nhang kat ri.

5 Nghut kôlhang, haû ji to huì é bang gi, dang haú lé haì su a gyô ngàm kômù, rayuq gi, yohtung shut, rayuq gi, hpugá dinggá hkyô shut ê byuq bekô nghut ri.

6 Ra-am dum nghut jáng, yhâng é dui-nhâng zoshâng wuì lé lhom chyup yû kômù, nhuq bat luî, sat pyám byì akô nghut ri.

7 Haû mù, hkohkâm gi, nhikjum yo luî, yhâng é gyezô pé lé, haû byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

8 Hau htâng má, yhang gi, yhâng é dui-nhâng zoshâng wuì lé, 'Myiháng poì gi, rì rì nghut to bê; nghut kôlhang, haû ji to huì é bang gi, lé râ a gingdán kó nghut ri.

9 Haû mù, hkyô kang pé má ê luî, myang é yuq hkgangmó lé, poì má lé râ matú ê jì keq.' ga taì ri.

10 Haû jáng, dui-nhâng zoshâng haú bang gi, hkyô kang pé má htoq ê luî, myang é byù gè byù gang lunglhang lé ji tsîng yù kô é nghut mù, myiháng poì gi, bíng pé zung byíng bùm bê nghut ri.

11 Nghut kôlhang, bíng haú bang lé, hkohkâm hpó, lé wang wú é hkûn, myiháng poì wàng hking a wut tô é byù rayuq lé, yhang byu-myang ri.

12 Haû mù, yhang gi, haú yuq lé, 'Buinùm hpó ê, nàng gi, myiháng poì wàng hking le a wut é nhîng,

shí má hkâsu kut wang lo é l hú?' ga myi jáng, háu yuq gi, hái le a dat tú táí lo nghut ri.

¹³ Háu hkûn, hkohkâm hpó gi, yhâng é dui-nhâng zoshâng wuì lé, 'Yhâng é hkyî loq má tui luî, háu ngaubyi ngaù nhap eq zuì kyik kyik shoq hpuzô nyì râ nghut é shinggan mauchut hkaû má, dú htoq pyám keq.' gâ ri.

¹⁴ Hkâsu mù gâ le, byù myo myo gi, ji yu é hui kôlhang, hkyin yù huì é bang gi, shaù ri." gâ ri.

Kehta q Lé Kang Kat Byî É Hkyô

Mrk 12:13-17; Luk 20:20-26

¹⁵ Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyî dâ akô nghut ri.

¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Háu bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é dông mhoqshit é sù nghut é lé le, Nàng gi, ó hái ga râ lé le hái su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê.

¹⁷ Háu mù, hkoséng Kehta q lé kang kat byî le gi, ge lhê l hú? A gè l hú? Nàng, hkâsu wó myit é hkyô táí kyô wú aq." ga táí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, hái mù, Ngo lé lé chyam wú akô l hú?

¹⁹ Kang kat râ ngùn htingchap rachap, Ngo lé byî wú keq." ga táí kat ri. Háu hkûn, yhangmoq gi, denari rachap yù byî akô.

20 Haû mù, Yhang gi, yhangmoq lé, "Shí má, ó yuq é alhô eq masat laiká dap tô ri lhú?" ga myi jáng,

21 yhangmoq gi, "Kehtaq é nghut ri." ga tâ taí akô. Haû mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga tâ kat ri.

22 Haû su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myî Chyam É Hkyô

Mrk 12:18-27; Luk 20:27-40

23 Haú nyí má yhang, haû dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô.

24 Yhangmoq myi kô é gi, "Sará ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng lé, Mosheq taí tô é nghut lhê.

25 Hí hpyang lé, ngamoq chyáng, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri.

26 Haû eq rajung za, Lanong, Lalaq mai Lahká jé shoq, chuimó haú lé gon luí, ó le zo dù a dap é za shi ló byuq bùm bekô nghut ri.

27 Ló htáng má, myiwe myhí haú le châng shi ló byuq bê nghut ri.

28 Haû mù luí, haû dum dui toq é buinyì má, myiwe myhí haú gi, haú nhiktâng wuì nyhit yuq mâ é hká yuq é yhangmyi nghut râ lhú? Hkâsu mù

gâ le, yhang gi, haú nhiktâng wuì banshoq bâng é yhangmyi dut wú bê sù nghut ri." gâ akô.

²⁹ Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri.

³⁰ Haú dum dui toq é buinyì má gi, myi byi myi yú hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê.

³¹ Shi é mai dum dui toq bang eq séng luí,

³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê. [☆] ga, nungmoq lé taí tô é lé, nungmoq a nghap wú kó l hú? Yhang gi, shi to bâng é Garai Gasang a nghut; dui nyì bâng é Garai Gasang sheq ru nghut lhê." ga taí ri.

³³ Byù moq mó gi, dang haú wó gyo kôjáng, Yhang mhoqshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô.

³⁵ Yhangmoq má bo é tarâ sará rayuq gi, Yesuq lé chyam wú é dông,

³⁶ "Sarâ ê, jep é tarâ má, hká lhum gi, je ahkyak dik lhê l hú?" ga myí ri.

³⁷ Haú mù, Yesuq gi, "'Haú Yhumsîng náng é Garai Gasang lé, náng é myit nhiklhum banshoq,

[☆] 22:32 Htoq Ló 3:6

náng é asak woi-nyí lhum gón, nàng myit é hkyô banshoq èq, chyitdap râ lhê.'✧ gâ é nghut lhê.

38 Tarâ haû gi, je hí lhum eq je ahkyak dik é lhum nghut lhê.

39 Hau htang lhum le haû eq du é nghut mù, 'Náng gûng lé nàng chyitdap é su, náng é chyangnâm mâ é bang lé le chyitdap aq.'✧ gâ é nghut lhê.

40 Tarâ haû í lhum gi, jep é tarâ banshoq eq myichtoi laiká banshoq é dangchyûng nghut lhê." ga, yhang lé taí kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

41 Hparishe pé zup zîng to kô é hkûn, Yesuq gi, yhangmoq lé,

42 "Nungmoq gi, Hkrisduq eq séng luí hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tû taí akô.

43 Haû mù, Yhang gi, yhangmoq lé, "Haú hkûn, Dawiq gi, Woi-nyí dông mai, Yhang lé, 'Yhumsîng' ga, haí mù wut lhê lhú? Hkâsu mù gâ le, Dawiq taí é gi,

44 'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyì shi aq." ga taí ri.'✧ gâ ri.

✧ 22:37 Tarâ Pun 6:5 ✧ 22:39 Nhung 19:18 ✧ 22:44 Hkya-on 110:1

⁴⁵ Haû mù, Dawiq yhang lhang, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lhu?" ga taî ri.

⁴⁶ Haû mù, ó yuq le, dang rahkun lhang a wó tû taî lo kô é nghut mù luî, haû nyí mai, ó yuq lhang Yhang lé dangmyi a wám myi lo kó nghut ri.

23

Tarâ Sará Pé Eq Hparishe Pé Lé Sidiq Râ Hkyô
Mrk 12:38-40; Luk 11:37-52; 20:45-47

¹ Hau htâng, Yesuq gi, byù moq mó eq Yhâng é chângzô pé lé taî é má,

² "Tarâ sará pé eq Hparishe pé gi, Mosheq é tanghkuq má zung akô.

³ Haû mù, yhangmoq mhoqshit é hkyô chângiup lé, nungmoq châng kut ra kó râ nghut lhê. Nghut kôlhang, yhangmoq kut é dông gi, hkâkut kó; hkâsu mù gâ le, yhangmoq gi, yhangmoq taî é dông a kut kó nghut ri.

⁴ Yhangmoq gi, byu pé é goqsân má wòlai ke byi kôlhang, yhangmoq yhang gi, wò haû pé lé bo waq râ matú, loqnyhui lhang a kâm lhoq tuî kó nghut ri.

⁵ Yhangmoq kut é hkyô lhunglhang gi, byu pé myàng râ matú za kut shit é nghut akô; haû chyumbun bo é showuî-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri;

⁶ yhangmoq gi, poî pé mâ é réng é jowò pé eq tarajong pé mâ é ahkyak dik é zùng jang pé má, myang zùng râ lé ô nau nyi akô;

⁷ yhangmoq gi, gài pé má lhom shi-kyâm yù kó rã eq, byu pé mai, yhangmoq lé, 'Rabai'* ga lhom wut kó rã lé ô nau nyi bum akô.

⁸ Nungmoq kúm gi, 'Rabai' ga wut rã lé hkâ-ô nau kó; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê.

⁹ Haû mù, myidàm htoq má, ó yuq lé le, 'âwa' hkâ-nghû kó; hkâsu mù gâ le, mauhkûng htoq mã é Îwa rayuq za, nungmoq é Îwa nghut lhê.

¹⁰ Hau htoq agó, 'sará' ga wut rã lé, hkâ-ô nau kó; hkâsu mù gâ le, Hkrisduq za, nungmoq é Sará nghut lhê.

¹¹ Nungmoq mã é je gyaú sù gi, nungmoq é dui-nhâng zoshâng dut rã nghut lhê.

¹² Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui rã nghut lhê, yhumsing gùng lé lhoq nyhûm sù kúm gi, waq toq é hui rã nghut lhê.

¹³ Gegùn labyoq nghut é, tarã sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pé hí má, mauhkûng mingdán hkyô lé xaû tô akô; nungmoq yhang le a wàng kó, wàng nau nyi bang lé le a wàng nhâng kó nghut ri.

¹⁴ (Gegùn labyoq nghut é, tarã sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, chuimó pé é yhûm-yò pé lé hpyoq zo hpyoq shuq é eq kyû hîng hîng dúng shit

* **23:7** Aramaik dang dông *rabai* gâ é gi, sará gâ é lichyúm nghut lhê.

mhaû é bang nghut akô; haû mù, dam byî é je myo hui zo kó rà nghut lhê.†

15 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byù rayuq lé nungmoq é noqkuq htûng má wó lhoq lhik yû rà matú, myî hkyô, wuî hkyô, châng jón wún kômù, wó lhoq lhik yu é sù lé gi, nungmoq su ngaraî byù í tú shuî dut akô nghut ri.

16 Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luî dakam é sù gi, haî a ra; noqkuq yhûm mâ é hîng lé lang mù dakam é sù kúm gi, cháng ra bê.' ga lhaq taî akô.

17 Myoqjit é byù nâ pé ê! Haû hîng eq hîng lé lhoq yúnglhô é noqkuq yhûm gi, hká lhum je ahkyak lhê lhú?

18 Hau htoq agó, nungmoq gi, 'Haû hkungga gyap lé lang luî dakam é sù gi, haî a ra, nghut kôlhang, haû hkungga zè lé lang mù dakam é sù gi, cháng ra bê.' ga le, lhaq taî akô nghut ri.

19 Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lhú?

20 Haû mù, haû hkungga gyap lé lang luî dakam é sù gi, haû hkungga gyap eq hau é ahtoq má ke tô é zè banshoq lé lang luî dakam é sù dut bê nghut ri.

21 Noqkuq yhûm lé lang luî dakam é sù gi, haû noqkuq yhûm eq haú má nyi é Sù lé lang luî dakam é sù dut bê nghut ri.

† 23:14 Chyúmding ra-am má gi, bun zo 14 shî a bo é nghut lhê.

22 Hau htoq agó, mauhkûng lé lang luí dakam é sù gi, Garai Gasâng é tanghkuq eq haú má zung é Sù lé lang luí dakam é sù dut bê nghut ri.

23 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, xunmân nghut é gau-tsáng shingtón, bantsaí, hpakkyí pé mâ é xê gambùm ragambùm lé gi, byí nyí kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê.

24 Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri.

25 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri.

26 Hparishe myoqjit pé ê! Zo hkoq shuq góm é ahte lé hí chí yúng pyám keq, haú jáng, ahtoq le sân-yúng râ nghut lhê.

27 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, but hpyu tô é lup pé eq du akô; haú pé gi, ahtoq má wú yúng kôlhang, ahkaû má gi, mâng bup showui pé eq achayut é chângjup byíng tô é nghut ri.

28 Haú eq rajung za, nungmoq gi, byu pê hí má, ahtoq pyâm dingmán é su kut shit kôlhang, ahkaû má gi, gegùn labyoq kut é eq agè ashop é hkyô pé byíng zan tô ri.

29 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, myiqhtoî pé é lup lé luptsuq tsuq kômù, dingmán bâng é lup pé lé mhón byi kôluî,

30 'Ngamoq gi, ngamoq é îchyí îwa pé é ipyat má nyi âng é ru nghut le gi, haû myiqhtoî pé é sui lhoq shun é bang má, ngamoq bo lòm râ a nghut.' ga lhaq taî akô.

31 Haû su mù, nungmoq gi, haû myiqhtoî pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri.

32 Haû mù, nungmoq é îchyí îwa pé hi tô é muzó lé, banshoq châng kut pán keq!

33 Lhangmuì pé ê, duq htân lhangmuì amyû pé ê! Ngaráí míng é dam byi hkyô mai, hkâsu wó h pang lut kó râ lú?

34 Hau é yanmai, myiqhtoî pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang mâ é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rî wún kó râ nghut lhê.

35 Hau é yanmai, haû dingmán sù Abelaq é sui mai hî luî, noqkuq yhûm eq hkungga gyap gyoro má nungmoq sat pyâm é, Berehkiaq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê.

36 Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang lé luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaû má tsìng lhùng yu é su, nungzô pé lé, Ngò, hkâ-myhó dâm shuî tsìng yù nàu kôlhang, nàng a dóng nghut ri.

³⁸ Wú keq, nungmoq é yhùm gi, nungmoq é matú chamchyuyùi dut pyám to berâ nghut lhê.

³⁹ Hkâsu mù gâ le, Ngò, nungmoq lé taí kôlé, 'Yhumsing é myìng mai jé lé lo é Sû gi, hkungsô wó nyî sháng gaq. '☆ ga, nungmoq a taí taí gi, Ngo lé wó myâng kó râ a nghut lo.' gâ ri.

24

Ló Htâng Buinyì Má Dut Lò Râ Hkyô

Mrk 13:1-31; Luk 21:5-33

¹ Yesuq gi, noqkuq yhùm mai htoq e ló é u lé, Yhâng é chángzô pé gi, Yhâng é nàm má huî lé lô kômù, haû noqkuq yhum é loqmú pé lé tân shit akô.

² Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok haú pé gi, rachâm htoq racham lhang a kê lhum loshoq, hpyoq hpyi pyám é hui râ nghut lhê." ga taí ri.

³ Yesuq gi, Tsanlun Bùm má zung tô é hkûn, haû chángzô pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhám dut lò râ lú? Nàng gyó lé râ hkûn eq ló htâng buinyì má, hkasû é kumhá htoq lô râ nghut lhê lú? Ngamoq lé taí kyô wú laq." ga, Yhang lé myî akô.

☆ 23:39 Hkya-on 118:26

⁴ Haú hkûn, Yesuq, yhangmoq lé tâ taî é gi, "Nungmoq lé, ó yuq êq le a wó shuî nghoq sháng gaq, sidiq nyî keq.

⁵ Hkâsu mù gâ le, 'Ngò gi, haú Hkrisduq nghut lhê.' ga, Ngá myîng lé lâng é byù myo myo pô htoq lô mù, byù myo myo lé hkyô shuî nghoq kó râ nghut lhê.

⁶ Nungmoq gi, majan dut nyî é hkyô eq majan eq sêng é danglám pé lé, wó gyo kó râ nghut lhê; nghut kôlhang, hkâgyuq dàn kó. Haú hkyô pé gi, dut lò râ za nghut lhê; nghut kôlhang, lô htâng é buinyî gi, a nghut shi.

⁷ Byù ra-myû eq ra-myû, mingdán ralhüm eq ralhüm majan zân lhüm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê.

⁸ Haú pé gi, wuîhke jamjau hkyo é apûn awang za ru nghut ashî.✧

⁹ Haú hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lhunglhang bang gi, Ngá é yanmai, nungmoq lé a nguî kut kó râ nghut lhê.

¹⁰ Haú u lé, byù myo myo gi, lumjîng myit lé tô pyám kômù, rayuq eq rayuq a nguî lhum dut é htoq agó, rayuq eq rayuq ap pyâm lhum kó râ nghut lhê.

¹¹ Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuî nghoq kó râ nghut lhê.

¹² Agè ashop é hkyô myô jat lo é yanmai, byù myo myô é chytidap myit gi, kân lô byuq râ nghut lhê;

✧ 24:8 Esai 19:2

13 nghut kôlhang, jihtûm jé shoq wó hkam jân nyi é sù gi, hkyi yu é hui râ nghut lhê.

14 Byù myù banshoq má saksé dut râ matú, haù mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyi jé râ nghut lhê.

15 Haù mù luí, myiqhtoi Danielaq dông mai taí tô é eq rajung za, 'haù lhoq hten lhoq hpyoq é achag achyut hkyô'☆ gi, chyoiyúng jowò má shap tô é lé, nungmoq myàng kó râ nghut lhê. (Chyúmlaika nghap sù gi, sê gyo sháng gaq).

16 Haù hkûn, Yuda mau má nyi é bang gi, bùm pé shut hfang doq ló kó sháng gaq.

17 Yhumhkûng htoq má nyi tô é sù gi, yhúmhaù mâ é zè haí lé le, a ló gyó wang yù lo sháng gaq.

18 Yò má nyi tô é sù gi, yhâng é buhîng lé a ló taù yu nyi lo sháng gaq.

19 Haù buinyi pé má, zogûng dut é myiwe eq naú huq ashî nghut é înu wuì gi, gyai yhang wuîhke jamjau kó râ nghut lhê.

20 Haù nungmoq hpâng râ buinyi gi, gyoqmyò,* a nghut jáng, Bánno buinyi má a ang râ matú, kyûdûng nyi keq.

21 Hkâsu mù gâ le, mingkan lé joq é hkûn mai ahkuí jé shoq, hkâ-nhám le a dut wú shî é wuîhke jamjau mó gi, haù buinyi pé má dut lò râ nghut lhê; haù sù é hkyô gi, htàngnùng má hkâ-nhám le dum dut lo râ a nghut.

22 Buinyi haù pé lé lhoq shaù pyâm é za a nghut le gi, ó yuq le asak wó lut râ a nghut; nghut kôlhang,

☆ 24:15 Dan 9:27; 11:31; 12:11 * 24:20 Israelaq mau má gi, gyoqmyò lé hkyô htoq le gyai wuîhke é ahkyíng nghut lhê.

Garai Gasang èq hkyin yù hui bâng é matú gi, buinyì haú pé lé, lhoq shaù pyám byi râ nghut lhê.

²³ Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haú a nghut jáng, 'Wú keq, Yhang hê má nyi ri.' ga taí jáng, nungmoq hkâjíng kó.

²⁴ Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklaí kumlhá pé lé kut shit kó râ nghut lhê.

²⁵ Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

²⁶ Haú mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gok hkaú má lúng tô ri.' ga jáng le, hkâjíng kó.

²⁷ Hkâsu mù gâ le, bui htoq hkyam má lhap hpyat é gi, bui wang hkyam má lhang jé shoq duqbó é su, haú Byu Yhangzo jé lé é hkûn le, dut râ nghut lhê.

²⁸ Màng leq é jang má, langdâ pé, lé zîng bùm râ nghut lhê.

²⁹ Buinyì haú pé mâ é wuîhke jamjau lai eq yhang,

'Bui gi, noq byuq mù, lhamó gi, a tsô dut byuq râ nghut lhê;

kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huî bùm kó râ nghut lhê.'[☆]

³⁰ Haú hkûn, haú Byu Yhangzô é kumlhá gi, mauhkûng má htoq shit lô râ nghut mù, myidâm

[☆] 24:29 Esai 13:10; 34:4

htoq mâ é byù myû lhunglhang gi, yón ngau bùm kó râ nghut lhê. Haù Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhang-moq byu-myàng kó râ nghut lhê.

³¹ Hau htâng má, Yhang gi, Yhâng é maumang lagyô pé lé, tut htê mó eq nhang kat luî, yhang-moq gi, maumyî chyûn myi chyûn eq mauhkûng rahkyam mai, gó hkyam htum shoq mâ é, Yhang hkyin yu tô é bang lé shuî tsîng yù kó râ nghut lhê.

³² Maihpáng gam lé wú mù, mhoq yû keq; agàm mai a-nyuq nyûn lô mù, ahaq htut lô jáng, bui nyé nám chyâng lò bê lé, nungmoq sê lhê.

³³ Haù eq rajung za, shí hkyô banshoq† lé, nung-moq myàng kôjáng, Yhang gi, chyáng bê nghut mù, hkúmdong má lhang nghut nyî bê hkyô lé, nungmoq sé lo keq.

³⁴ Ngò, nungmoq lé teng za taí kôlé, shí pyat mâ é byu pé a ban shi byuq shimá, haù hkyô pé‡ banshoq dut byuq râ nghut lhê.

³⁵ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyî râ nghut lhê.

Haù Buinyì Eq Ahkyíng Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyì eq ahkyíng haù lé gi, ó yuq le a sé; mauhkûng htoq mâ é maumang lagyô pé lhang a sé; haù Zo le a sé; haù Îwa za ru sê lhê.

† **24:33** *Shí hkyô banshoq* gâ é gi, Yesuq jé lé râ hí má dut râ hkyô pé lé taí é nghut lhê. ‡ **24:34** *Haù hkyô pé* gâ é gi, Yerusalem noqkuq yhûm htên byoq râ lé taí é nghut lhê.

37 Noaq é tsîn pyat má dut é su, haû Byu Yhangzo lé lo é hkûn le, dut râ nghut lhê.

38 Hkâsu mù gâ le, dowuî a dîng shî é buinyî pé má, byu pé gi, Noaq, wuî-sanghpo mó hkaû má wang é hkûn jé shoq, zo zo shuq shuq, myi byi myi yû, kut nyi bum akô nghut ri;

39 yhangmoq gi, dowuî dîng lô mù, yhangmoq banshoq lé ûm sat pyâm é hkûn jé shoq, haî dut lò râ lé, a sé kó dut bùm é su, haû Byu Yhangzo lé lo é hkûn le, dut râ nghut lhê.

40 Haû hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut lhê.

41 Luqluí chôm lâng nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to râ nghut lhê.

42 Haû su mù, haû nungmoq é Yhumsîng gi, hká nyí jé lé lô râ lé, nungmoq a sê kô é yanmai, sidiq machya nyi keq.

43 Myín hká u má hkau sû jé lé lò râ lé, yhumsîng sê é ru nghut le gi, yhâng é yhûm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq.

44 Haû mù, nungmoq le rì rì nghut nyí keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê.

45 Yhumsîng hpô é dui-nhâng zoshâng wuî lé, uphkâng râ eq ahkyíng jé jáng zoshuq gâm byi râ matú, yhumsîng hpô èq mù nhang tô é, lhumzui luî, hpaqchyî bo é dui-nhâng zoshâng gi, ó yuq nghut râ lhu?

⁴⁶ Yhumsîng hpó dum taû lo é hkûn, haû su kut nyî láng é dui-nhâng zoshâng gi, hkungsô wó nyi ri.

⁴⁷ Ngò, nungmoq lé teng za taí kôlé, yhumsîng hpó haû gi, yhâng é sutzè banshoq, dui-nhâng zoshâng haû yuq lé ap to râ nghut lhê.

⁴⁸ Nghut kôlhang, laqma mù, dui-nhâng zoshâng haû yuq gi, agè ashop sù nghut luí, 'Ngá é yhumsîng hpó jé lô râ gyai myáng ashî.' ga, yhâng é i-myit unghkaû má myit yù mù,

⁴⁹ gotû dui-nhâng zoshâng luzúm wuî lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi,

⁵⁰ dui-nhâng zoshâng hau é yhumsîng hpó gi, yhang a myitngam tô é buinyi eq yhang a sê tô é ahkyíng má jé lô mù,

⁵¹ yhang lé jap pyám luí, gegùn labyoq kut bang hkâm zô é, ngaubyi ngàu nhap eq zuí kyik kyik shoq hpuzô nyi rá jowò má hkyô pyám râ nghut lhê.

25

Zomyi Raxê Yuq Lé Dangtú Yu É Hkyô

¹ Haû hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê.

² Haû bang má, ngo yuq gi, nhik a gying kó; ngo yuq gi, nhik gyíng akô nghut ri.

³ Haû nhik a gyíng é bang gi, myibung yu chûng kôlhang, xû a yu chûng kó nghut ri.

⁴ Nghut kôlhang, haû nhik gyíng é bang kúm gi, yhangmoq é myibung lé le, xû bo é bòng lé le yu chung akô nghut ri.

⁵ Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.

⁶ Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garû é htê htoq lo ri.

⁷ Haú hkûn, zomyi haú bang banshoq gi, toq lô mù, yhangmoq é myibung lé hen lajáng akô nghut ri.

⁸ Haú nhik a gyíng bang gi, 'Ngamoq lé, xú ratsuí byi kó laq; hkâsu mù gâ le, ngamoq é myibung shi ló nyi ri.' ga, haú nhik gyíng bâng chyáng dúng akô.

⁹ Haú hkûn, haú nhik gyíng bang gi, 'Nungmoq eq ngamoq é matú ga jáng, luq râ a nghut. Haú mù, nungmoq é matú, xú ung bâng chyáng ê wui yù keq.' ga tû taí kat akô.

¹⁰ Yhangmoq, xú wui e ló kô é hkûn, lusik gi, jé lé lô mù, haú rì rì hen tô é zomyi wui gi, yhang eq rahá myiháng poí má wang ló bekô. Hkum le myhî byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lô kômù, 'Yhumsíng ê! Yhumsíng ê! Ngamoq lé, hkum hpóng byi laq ô!' ga taí akô.

¹² Nghut kôlhang, haú lusik gi, 'Ngò, nungmoq lé teng za taí kôlé, nungmoq lé ngò a sé.' ga tû taí kat ri.

¹³ Haú mù luí, haú Byu Yhangzo jé lé râ buinyì eq ahkýíng lé, nungmoq a sé kô é yanmai, sidiq machya nyì keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

14 Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wuì lé wut yù luí, yhâng é sutzè lé ap byí to sù eq pung ashî nghut ri.

15 Yhang gi, yhangmoq é a-tsam má cháng luí, rayuq lé gi, ngùn ngo jói, rayuq lé gi, í jói, htâng rayuq lé gi, rajoí kut byí to mù, byìn we shut htoq ló byuq bê nghut ri.

16 Ngùn ngo jói wó yù sù gi, haú hkûn jáng htoq ló mù, hpugá gá luí, ngùn ngo jói wó myat yù bê nghut ri.

17 Haù eq rajung za, ngùn í jói wó yù sù le, í jói wó myat yù bê nghut ri.

18 Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsîng hpô é ngùn lé haq myhup tô ri.

19 Hau htâng tsómra myáng jáng, dui-nhâng zoshâng haú bâng é yhumsîng hpó gi, dum taù jé lô mù, yhangmoq é ngùn chyârâng lé, lo jep ri.

20 Ngùn ngo jói wó yù sù gi, amyat ngo jói lé le yu lé lô mù, 'Yhumsîng ê, nàng, ngo lé, ngùn ngo jói ap tô é nghut lê. Wú aq, amyat ngo jói wó ho jat yù bê.' ga taí ri.

21 Haú hkûn, haù yhumsîng hpó gi, 'Arâ! Nghut bê. Nàng gi, kyet é eq lumgîng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lê. Nàng yhumsîng hpô é gabú hkyô má bo wang lôm aq hkoi!' ga tù taí ri.

22 Haù eq rajung za, í jói wó yù sù le, lé lô mù, 'Yhumsîng ê, nàng, ngo lé ngùn í jói ap tô é nghut

lhê. Wú aq, amyat í joí wó ho jat yù bê.' ga, lé taí ri.

²³ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mú má lháng wó lum é sũ nghut é yanmai, ngò, nang lé, kô é mú lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tù taí ri.

²⁴ Hau htâng, rajoí wó yû sũ le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang mâ é shû yù nau é htoq agó, yhumsîng, kyôshi a sân hkyô tô é jang mâ é tsíng yù nàu sũ nghut é lé, ngò sé lhê.

²⁵ Haú mù, ngò gi, gyuq luí, htoq ê mù, náng é ngùn lé, myigùng má ê haq myhup tô é nghut lhê. Wú aq, shí gi, nàng é ngùn nghut lhê.' ga taí ri.

²⁶ Haú mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shû yù nau é eq, yhumsîng, kyôshi a sân hkyô tô é jang mâ é tsíng yù nàu sũ nghut é lé, nàng sê to gù nghut le nhîng,

²⁷ ngá é ngùn lé, ngò dum taú jé lô jáng, aráng eq amyat wó yû shoq, ngùn hpún kat jang má, haí mù a kat tô é lhú?

²⁸ Haú mù, haú ngùn rajoí lé, náng chyáng mai yù luí, raxê joí wó to sũ lé, byî pyám nhâng râ nghut lhê.

²⁹ Hkâsu mù gâ le, wó sũ ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lháng yu pyám byi shirâ nghut lhê.

³⁰ Haú mù, haú akyû a bo é dui-nhâng zoshâng lé gi, ngaubyi ngàu nhap eq zuì kyik kyik shoq hpuzô

nyì râ jowò nghut é, shinggan mauchut hkaû má dú htoq pyám keq.' gâ ri.

Sau Eq Bainám

³¹ Haû Byu Yhangzo gi, Yhâng é hpungwup shingkang mai, maumang lagyo lhunglhâng bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq má zùngrâ nghut lhê.

³² Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotû tû kut gam hkoq é su, byu pé lé gam hkoq pyám râ nghut lhê.

³³ Yhang gi, sau pé lé, loqyo hkyam shut, bainám pé lé, loqpaí hkyam shut kut, nyhi to râ nghut lhê.

³⁴ Hau htâng má, haû Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é mù mingdán má wang ló keq.

³⁵ Hkâsu mù gâ le, Ngò zòmút é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê;

³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nòhpyo huì é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taí râ nghut lhê.

³⁷ Haú hkûn, haû dingmán bang gi, Yhang lé, 'Yhumsîng ê, Nàng zòmút huì é lé, ngamoq, hkâ-

nhám myàng luí, byi tsô wú é lúhú? Nàng wuìshit é lé, ngamoq, hkâ-nhám myàng luí, byi huq wú é lúhú?

³⁸ Nàng bíng kut wún é lé, ngamoq, hkâ-nhám myàng luí, lhom hkulum wú é lúhú? Nàng gùngchín dut é hkûn, ngamoq, hkâ-nhám byi hut wú é lúhú?

³⁹ Nàng nòhpyo huí é lé le, htóng lúng é lé le, ngamoq, hkâ-nhám myàng luí, lé gon lé kùm wú é lúhú?' ga myi kó râ nghut lhê.

⁴⁰ Haú hkûn, haú hkohkâm gi, 'Ngò, nungmoq lé teng za tái kôlé, shí, Ngá gumang wuì mâ é je tiq sù lé, nungmoq kut byí é hkyô haí le, Ngo lé kut byí é nghut bê.' ga tû tái râ nghut lhê.

⁴¹ Hau htâng má, Yhang gi, Yhâng é loqpaí hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq.

⁴² Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó;

⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchín dut é u lé, nungmoq, Ngo lé, mebu a byi hut kó; Ngò nòhpyo huí é eq htóng lúng é u lé, nungmoq, Ngo lé a gon kó nghut ri.' ga tái râ nghut lhê.

⁴⁴ Haú hkûn, yhangmoq gi, 'Yhumsîng ê, nàng zòmut wuìshit é, bíng kut wún é, gùngchín dut é, nòhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lúhú?' ga taú myi kó râ nghut lhê.

⁴⁵ Haú hkûn, Yhang gi, 'Ngò, nungmoq lé teng za tái kôlé, shí bang mâ é je tiq sù lé, nungmoq, a kut

byî é hkyô haî le, Ngo lé a kut byî é nghut bê.' ga, yhangmoq lé tû taí râ nghut lhê.

⁴⁶ Haû mù luî, haú bang gi, ahtum abyuq mara dam byî é má wang ló kó râ nghut lhê; haû dingmán bang kúm gi, ahtum abyuq é asak má wang ló kó râ nghut lhê." ga Yesuq taí ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haú hkyô pé lé ban taí é htâng má, Yhâng é chángzô pé lé,

² "Nungmoq sê tô é eq rajung za, í nyí laî é htâng má, Lhoqlhai Poî jé râ nghut mù, haû Byu Yhangzo gi, tapzîng má jén sat é hui râ matú, ap pyâm é hui râ nghut lhê." ga taí ri.

³ Haú u lé, hkyangjong agyi pé eq suwún wuî gi, Kayahpaq gâ é hkyangjong mó rayuq é yhumwàng má zup zîng to kômù,

⁴ Yesuq lé haq chyup yû râ eq sat pyám râ hkyô lé, hpyê lhûm bum akô nghut ri.

⁵ Nghut kôlhang, yhangmoq gi, "Byu pé gabyông lò kó abe, poî gyoro má gi, a kut shi sháng." ga, taí lhûm akô nghut ri.

Yesuq, Xû Hut Gyun Huí É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sû Simún é yhûm má nyi tô é hkûn,

⁷ myiwe myhí rayuq gi, gyai hpaû é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byî ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haî mù luî, haú lé aha agó kut pyâm lhê lú?"

⁹ Xû haú lé, ahpau myo myô èq ùng pyám mù, myùng bang lé byî le ge lhê mhaî!" ga taí kat akô.

¹⁰ Yesuq gi, haú hkyô lé sé luî, "Haî mù, myiwe zo haú lé, i-myit lhoq myô nyi akô lú? Yhang gi, Ngá é ahtoq má ge é hkyô kut bê nghut ri.

¹¹ Haú myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut.

¹² Yhang, Ngá gûng má namngón xû hut gyûn é gi, Ngá gûng lé yhum râ matú, hen lajâng é hkyô nghut ri.

¹³ Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, taí kyo bekô râ nghut lhê." ga taí kyo ri.

Yesuq Lé, Yudaq Èq Ung Zô Pyâm É Hkyô

Mrk 14:10-11; Luk 22:3-6

¹⁴ Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pê chyáng ê mù,

¹⁵ "Ngò, Yesuq lé nungmoq é loq má ap byî é nghut jáng, nungmoq, ngo lé haî byi kó râ lú?" ga myî ri. Haú mù, yhangmoq gi, yhang lé ngùn denggá sum xê chap nghap byî akô.

¹⁶ Haú hkûn mai, Yudaq gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

17 Múnchi a kat é Muk Zo Poî sâng-hi nyí má, haû chángzô pé gi, Yesuq chyáng lé lô kômù, "Nàng zo râ Lhoqlhai Poî zoshuq lé, ngamoq hkâmá món to râ lhú?" ga myí akô.

18 Haû mù, Yhang gi, "Myuq hkaû shut wang ló mù, byù rayuq chyáng ê luí, haú yuq lé, 'Ngá é ahkýng chyáng bê; Ngá é chángzô pé eq rahá, Ngò, náng é yhùm má Lhoqlhai Poî kut râ nghut lhê.' gâ Sará taí ri nghû, ê taí keq." ga pying kat ri.

19 Haû mù, haû chángzô pé gi, Yesuq pying kat é eq rajung za ê taí kômù, Lhoqlhai Poî lé món to bekô nghut ri.

20 Myinhâng jé lô jáng, Yesuq gi, haû chángzo raxe í yuq eq rahá, zohpoq má zung tô ri.

21 Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." ga taí ri.

22 Haú hkûn, yhangmoq gi, gyai gyô yón kômù, rayuq htâng rayuq, "Yhumsîng ê, ngò a nghut hkaí?" ga, Yhang lé chôm myí akô.

23 Haú hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám râ sù nghut lhê.

24 Haû Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôhang, haû Byu Yhangzo lé ap pyám é sù gi, dingnyé wó ri; haú yuq gi, a hku lé le lháng, je ge ri." ga dum taí kat ri.

25 Hau htâng, Yhang lé ap pyám râ sù, Yudaq gi, "Rabai ê, ngò a nghut hkaí?" ga myí jáng, Yesuq gi, "Nàng nghut ri." ga tû taí kat ri.

26 Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí

gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byî ri.

²⁷ Hau htâng, Yhang gi, góm lé le, yù mù, jeju hkya-on luî, yhangmoq lé byi mù, taí é gi, "Nungmoq banshoq bang, shuq keq.

²⁸ Shî gi, yubak mara hkyut pyám byi râ, byù myo myô é matú htoq pyâm é, dangshikaq eq sêng é Ngá sui nghut lhê.

²⁹ Ngò, nungmoq lé taí kôlé, ahkuî mai gi, Ngò, Ngá Wâ é mingdán má, nungmoq eq rahá tsibiyiq wing asik lé shuq é buinyì a jé jé, tsibiyiq wing lé dum shuq râ a nghut lo." ga taí ri.

³⁰ Yhangmoq gi, hkya-on mahkôn ralhüm ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Lé, Te Tai É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yhangmoq lé, "Nungmoq lunglhâng bang gi, hkû-myîn yhang jáng, Ngá é yanmai, myit lingbat kó râ nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau hpúng mâ é sau pé gi, lhoq pyo pyâm é hui kó râ nghut lhê.'✧

ga kê tô ri.

³² Nghut kôhang, Ngò gi, lhoq dui toq é huî htâng má, Galile mau shut, nungmoq é hí má e ló láng râ nghut lhê." gâ ri.

³³ Haú hkûn, Petruq gi, "Náng é yanmai, góbang banshoq myit lingbat kôhang, ngò gi, hkâ-nhám le myit lingbat râ a nghut." ga tû taí ri.

34 Yesuq gi, "Ngò, nang lé teng za tái lé, hkû-myîn yhang jáng, woq a tûn shimá, nang, Ngo lé sum dâm he-ngik pyám rả nghut lhê." ga tû tái ri.

35 Nghut kôlhang, Petruq gi, "Ngò, Nang eq rahá shî rả dut kôlhang, Nang lé ngò he-ngik pyám rả a nghut." ga sâi tái ri. Haû chángzô pé góbang banshoq le, haû su ga châng tái bum akô nghut ri.

Get-samane Gâ É Jowò Má Kyûdûng É Hkyô

Mrk 14:32-42; Luk 22:39-46

36 Hau htâng má, Yesuq gi, Yhâng é chángzô pé eq rahá Get-samane gâ é jowò má ê kômù, yhangmoq lé, "Ngò, hé má ê mù, kyûdûng nyi é u lé, nungmoq shí má zùng lánq keq." ga tái ri.

37 Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri.

38 Hau htâng, Yhang gi, yhangmoq lé, "Ngò gi, shî rả í yhang myit yón nyi ri; nungmoq gi, Ngò su machyâ luí, shî má lánq nyi keq." ga tái ri.

39 Yesuq gi, haû mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm* shí lé, Ngá chyáng mai lhai pyám byi laq. Nghut kôlhang, Ngò ô nau é đông a nghut, Nang ô nau é đông sheq nghut sháng gaq." ga kyûdûng ri.

40 Hau htâng, Yhang gi, Yhâng é chángzô pé chyáng dum tái lo le, yhangmoq yhup myhí to kô é lé lo myàng ri. Haû mù, Yhang gi, Petruq lé, "Nungmoq gi, hkyíng hkum rahkum za lhang, Ngò eq rahá a wó machya nyi kó lú?"

* 26:39 Góm gâ é gi, Yesuq, jamjau hui rả hkyô eq shí rả hkyô lé, tái nau é nghut lhê.

41 Gunglaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

42 Yhang gi, radàm dum ê mù, "Âwa ê, góm shí lé, Ngò a shuq é a wó lai râ nghut jáng gi, Nàng ô nau é đông nghut sháng gaq hkoi." ga kyû dum dúng ri.

43 Yhang dum taú lo le, yhangmoq gi, myoqkuq lai kô é yanmai, yhup myhî to lánng kô é lé, lo dum myàng ri.

44 Haú mù, Yhang gi, yhangmoq lé tô pyâm to mù, sum dâm nghû râ dàm dum ê luí, hí lé dúng é dang lé roq é dum dúng ri.

45 Haú mù, Yhang gi, haú chángzô pê chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashî kó l hú? Wú keq! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyâm é hui râ nghut bê.

46 Toq keq! Ló losháng hkoi! Ngo lé ap pyám râ sù gi, jé lé bê nghut ri." ga taí ri.

Yesuq, Chyup Yû Huí É Hkyô

Mrk 14:43-50; Luk 22:47-53; Yhn 18:3-12

47 Yesuq, dâng nyo nyi ashî u lé, haú chángzo raxe í yuq má bo é Yudaq gi, jé lé lo ri; haú hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô.

48 Yesuq lé ap pyám râ sù gi, haú bang lé, "Ngò, bopuq puq é sù gi, haú yuq nghut bê; Yhang lé chyup yû keq." ga kumlhá byî tô ri.

49 Yudaq gi, Yesuq chyáng hkyê za ê mù, "Rabai ê, wángzán nyi lhê lú?" ga taí luí, Yhang lé bopuq puq byí ri.

50 Haú hkûn, Yesuq gi, "Buinùm hpó ê, nàng kut râ muzó lé kut aq hkoi." ga tû taí kat ri.

Hau htâng, yhangmoq gi, hí shut huí ê luí, Yesuq lé chôm zuí zìng mù, chyup yû bekô nghut ri.

51 Haú mù, Yesuq eq rahá nyi bang mâ é rayuq gi, shâm she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

52 Haú jáng, Yesuq gi, haú yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham èq shî râ nghut lhê.

53 Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi râ nghut é lé, nungmoq a sé kó lú?

54 Nghut kôlhang, haú su nghut é nghut jáng, shí hkyô dut lò râ nghut lhê ga Chyúmdang pé má bò tô é hkyô gi, hkâsu wó dik lò râ lú?" ga taí kat ri.

55 Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akó lú? Ngò gi, nyí wuí, noqkuq yhùm má zùng mù, mhoqshit nyí kôlhang, nungmoq, Ngo lé a chyup yû kô é nghut lhê.

56 Nghut kôlhang, shí su dut é hkyô pé banshoq gi, haú myiqhtoí pé kê tô é hkyô pé lo dik râ matú dut é nghut ri." ga taí ri. Haú hkûn, haú chángzô pé banshoq gi, Yesuq lé tô pyâm to kôluí, hpang byo byuq bekô nghut ri.

Yudaq Byìn Tú Wapdoq Má Jep Huê É Hkyô
Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haû tarâ sará pé eq suwún wuî zup zîng nyi é jang, hkyangjong mó Kayahpaq é yhûm má, Yhang lé shuî e akô.

⁵⁸ Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng nau luî, wâng hkaû má wang ê mù, zúng bang eq rahá zung tô ri.

⁵⁹ Haû hkyangjong agyi pé eq Yudaq byìn tú wapdoq mâ é góbang gi, Yesuq lé sat pyám nhâng râ matú, a têng é saksé ho nyi akô.

⁶⁰ A têng é saksé myo myo htoq lô kôhang, wó sat râ î é saksé a myàng kó nghut ri.

Ló htáng má, byù í yuq gi, lé lô kômù,

⁶¹ "Shí yuq gi, 'Ngò gi, haû Garai Gasâng é no-
 qkuq yhûm lé lhoq hten pyám mù, sum nyi gyoro má dum wó saî lhê,' ga taí sù nghut ri." ga taí akô.

⁶² Haú hkûn, haû hkyangjong mó gi, toq yap mù, "Nàng, haî le a tû taí luq? Shí bang, Nang lé mara hun nyi é saksé gi, hká dông nghut lhê lhú?" ga, Yesuq lé myî ri.

⁶³ Nghut kôhang, Yesuq gi, jit le a ga nyi tô ri.

Haú mù, hkyangjong mó gi, Yhang lé, "Haû rû dui nyi é Garai Gasâng é myîng lé lang luî, ngò, Nang lé myî wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jâng,

⁶⁴ Yesuq gi, "Nàng taí é eq rajung za nghut lhê. Ngò, nungmoq banshoq lé taí kôlé, nungmoq gi, ahkuî mai htâng hpyang má, haû Byu Yhangzo gi,

a-tsam bo dik Su é loqyo hkyam má zung tô é lé le, mhuthtui ji mù, mauhkûng mai lé lo é lé le, nungmoq myàng kó râ nghut lhê." ga taî ri.

⁶⁵ Haú hkûn, hkyangjong mó gi, yhâng é bu lé lâng cheq pyám mù, "Yhang gi, Garai Gasang lé rhoi dang taí bê nghut ri! Nga-nhúng, hai saksé râ ashî lú? Yhang, Garai Gasang lé rhoi dang taí é lé, nungmoq, ahkuí wó gyo bekô nghut lhê.

⁶⁶ Nungmoq hkâsu wó myit akô lú?" ga myi jáng, yhangmoq gi, "Yhang gi, shî gíng sù nghut lhê." ga tû taí akô nghut ri.

⁶⁷ Hau htâng má, yhangmoq gi, Yesuq é myoq-dong má sôkan byé gyun luí, loqtsup èq htui byí akô nghut ri. Góbang gi, Yhang lé bo-pyuq pyuq byi luí,

⁶⁸ "Hkrisduq Nàng, Nàng lé bat sù ó yuq nghut é lé, myiqhtoi htoí wú aq." ga taí akô.

Yesuq Lé, Petruq He-ngik Pyâm É Hkyô

Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaû má nyi tô é u lé, dui-nhâng zoshâng myhí rayuq gi, yhâng chyáng lé jé mù, "Nàng le, haú Galile byù Yesuq eq rahá nyi sù nghut ri." ga taî ri.

⁷⁰ Nghut kôlhang, Petruq gi, haú bang banshoq é hí má yhang, "Nàng haí taí nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haú jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haú má é bang lé taí kat ri.

⁷² Haú hkûn, yhang gi, "Byù haú yuq lé, ngò a sé!" ga dakam é dông he pyâm ri.

⁷³ Hau htâng razup zo má, haú jowò má yap to bang gi, Petruq chyáng huí ê kômù, "Nàng le, haú bang má bò sù yhang nghut ri; náng é danghtê lé sê gyô ri." ga taí akô.

⁷⁴ Haú hkûn, yhang gi, yhânggùng yhang nhing luí, "Haú yuq lé, ngò a sé." ga dakâm dang taí ri.

Haú-u yhang, woq tân bê nghut ri.

⁷⁵ Haú mù, Petruq gi, "Woq a tân shi má, nàng, Ngo lé sum dâm he pyám râ nghut lhê." ga, Yesuq, yhang lé taí é dang lé, myit bún kat mù, shinggan shut htoq é luí, gyai yhang ê ngau ri.

27

Yudaq Juíshi É Hkyô

Mrk 15:1; Luk 23:1-2; Yhn 18:28-32

¹ Napsûn noq le, hkyangjong agyi pé banshoq bang eq mingbyu é suwún wuí gi, Yesuq lé sat pyám nhâng râ matú chôm myit hpyit yû bekô nghut ri.

² Haú mù, yhangmoq gi, Yhang lé tuí yù luí, shuí htoq é kômù, mauzau Pilat chyáng ê ap byí akô nghut ri.

³ Yesuq lé ap pyám é sù Yudaq gi, Yesuq lé jéyáng doqdân é hkyô lé myang sé jáng, nungngham wó mù, haú ngùn sum xê chap lé, hkyangjong agyi pé eq suwún wui chyáng ló dum taú byí ri.

⁴ Haú mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haú hkyô, ngamoq eq haí sêng lhê lhú? Haú gi, nàng eq sheq ru sêng lhê." ga lhom taí kat akô nghut ri.

⁵ Haû mù, Yudaq gi, ngùn haú lé, noqkuq yhúmhaû má dú pyâm to luî, htoq ló mù, yhang gûng yhang ê juîshi byuq bê nghut ri.

⁶ Haû hkyangjong agyi pé gi, ngùn chap haú pé kui yù luî, "Shî gi, sui hpau ngùn nghut lhê yanmai, alu sidek má a ge kat." ga taî akô.

⁷ Haû mù, yhangmoq gi, tûngbaù pê é lupdùng kut râ matú, au saí zo su é maumyî lé, ngùn hau êq wui hpyit yû râ đông, chôm myit hpyit to bekô nghut ri.

⁸ Hau é yanmai, ahkuî jé shoq, haú jowò lé, sui myigùng ga myhîng tô akô nghut ri.

⁹ Haû gi, "Haû Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haû Yhumsîng Garai, ngo lé pying tô é eq rajung za,

¹⁰ haû au saí zo su é maumyî lé, yhangmoq wui yù bekô nghut ri." ga myiqhtoi Yerehiaq taî tô é dang lo dik é nghut ri.

Yesuq Lé, Pilat Myî Jep Wú É Hkyô

Mrk 15:2-15; Luk 23:3-5, 13-26; Yhn 18:33–19:16

¹¹ Haú u lé, Yesuq gi, mauzau hpô é hí má yap tô é nghut mù, haû mauzau hpó gi, Yhang lé, "Nàng gi, Yudaq byu pê é hkohkâm nghut lhê lhú?" ga myi jáng, Yesuq gi, "Nàng taî é eq rajung za nghut lhê." ga tû taî ri.

¹² Haû hkyangjong agyi pé eq suwún wuî gi, Yhang lé, mara hùn kôjáng, Yhang gi, haî le a tû taî nghut ri.

13 Haú hkûn, Pilat gi, Yhang lé, "Yhangmoq, Nang lé mara hûn saksé haû-í hkâm nyi kô é lé, Nàng a wó gyo lú?" ga saí myí ri.

14 Nghut kôlhang, Yesuq gi, dang rahkun lhang a tû taí é yanmai, haû mauzau hpó gi, gyai maú byuq bê nghut ri.

15 Haû Lhoqlhai Poí u lé, mingbyû wui ô nau é má cháng luí, haû mauzau hpó gi, htóng byû rayuq yuq lé nhâng byí é htung joq ri.

16 Haú u lé, a gè mying htoq é htóng byû, Barabaq ga sù rayuq nyi ri.

17 Haû mù, byû moq mó zup zing lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haú a nghut jáng, Hkrisduq gâ é Yesuq lé luq?" ga myí ri.

18 Yhang haû su ga myí é gi, yhangmoq, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri.

19 Pilat gi, tarâ jéyáng tingnyang htoq má zung tô ashí hkûn, yhangmyi gi, "Haû mara a bò Sû lé, haí le hkâkut; hkâsu mù gâ le, hkû-nyí za lhang, yhupmoq má, haú yuq é yanmai, ngò tsómra hpuzô pyám bê nghut lhê." ga, yhang chyáng dang pying kat ri.

20 Nghut kôlhang, haû hkyangjong agyi pé eq suwún wui gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.

21 Haû mauzau hpó gi, "Shí í yuq mâ é hká yuq lé, nhâng byi nhâng nau akô lú?" ga myi jáng, yhangmoq gi, "Barabaq!" ga tû taí akô nghut ri.

²² Haû mù, Pilat gi, "Haû jáng gi, Hkrisduq gâ é Yesuq lé, ngò hkâsu kut râ lú?" ga dum myí kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taí akô nghut ri.

²³ Nghut kôlhang, yhang gi, "Haí mù luí lú? Yhang gi, hai mara kut shut bê lú?" ga dum myí jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garû lo bum akô nghut ri.

²⁴ Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luí, uchyam yù mù, shiwa byu pê hí má loq chi luí, taí é gi, "Shí yuq é sui gi, ngò eq haí a séng; nungmoq eq za ru sêng lhê." gâ ri.

²⁵ Haû shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshû pê htoq má joq nyí sháng gaq." ga, dum tû taí kat akô nghut ri.

²⁶ Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byí kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

²⁷ Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shuí wang ló kômù, Yhâng é lhîngkhyuq má, gyedap gón lé ji tsîng tô akô.

²⁸ Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù,

²⁹ zujanmaú ralhum saí yù kôluî, Yhâng é ulhum má tsung byî akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluî, "Yudaq byu pê é hkohkâm hpó ê! Chyung hîng xê hing nyî sháng gaq ô!" ga, jihpoi dang taî akô.

³⁰ Yhangmoq gi, Yhang lé sôkan byé gyun luî, Yhâng é loq mai jàm-yang lú yù mù, Yhâng é ulhum má dum bat bat kut akô nghut ri.

³¹ Yhangmoq gi, Yhang lé rhoî jihkyoî ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luî, tapzîng má jén sat pyám rá matú, Yhang lé shuí htoq e ló bekô nghut ri.

Yesuq Lé Jén Pyâm É Hkyô

Mrk 15:22-32; Luk 23:27-43; Yhn 19:17-27

³² Yhangmoq htoq e ló nyi le, Kuruni myuq byû nghut é Simun ga sù lé myàng kômù, yhang lé, zik luî tapzîng waq nhang akô nghut ri.

³³ Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê.

³⁴ Haú má jé jáng, yhangmoq gi, Yesuq lé, hkô jung eq nyhò tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri.

³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byî akô.

³⁶ Hau htâng, yhangmoq gi, haú jowò má zung to mù, Yhang lé zúng nyî akô nghut ri.

37 Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kê tap tô akô.

38 Haú hkûn, Yhang eq rahá, damyaq í yuq lé le, Yhâng é loqpaî hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri.

39 Hkyô sô lai ló é bang gi, nyhap é dông u-ngut ngut mù, taí kô é gi,

40 "Noqkuq yhûm lé hpyoq pyám luî, sum nyí gyoro má dum wó saí lhê ga Sû ê! Nang, Garai Gasâng é Yhangzo nghut le gi, Náng gûng nang hkyi yù luî, tapzîng mai gyó lo wú aq mhaî!" ga akô nghut ri.

41 Haú eq rajung za, hkyangjong agyi pé, tará sará pé eq suwún wuí le, Yhang lé rhoî jihkyoî kut mù, taí kô é gi,

42 "Shí yuq gi, góbang lé hkyi yù sù nghut kôlhâng, Yhânggùng yhang gi, a wó hkyi yù nghut ri myhinhung! Yhang gi, Israelaq byu pé é hkohkâm nghut lhê lhà! Ngamoq wó lumjîng râ matú, Yhang, tapzîng mai gyó lo wú sháng gaq.

43 Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuî Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri.

44 Haú eq rajung za, Yhang eq rahá tapzîng má jén to huî é damyaq í yuq le, Yhang lé rhoî dang taí akô nghut ri.

*Yesuq Soqkâng Byit É Hkyô
Mrk 15:33-41; Luk 23:44-49; Yhn 19:28-30*

45 Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri.

46 Myinhtâng sum hkyíng kô má, Yesuq gi, "Eloi, Eloi, lama sabakhtani?" ga, htê mó èq garû kat ri. Hau é lichyúm gi, "Ngá Garai ê, Ngá Garai ê, Nàng, haî mù, Ngo lé tô pyâm tô lhê lú?" gâ é nghut ri. ✨

47 Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taî akô.

48 Haú hkûn jáng, yhangmoq mâ é rayuq gi, din e ló mù, wuìmaù lé é yu ri. Yhang gi, haú lé tsibiyiq wíng chyín má jum yù luí, jàm-yang má tuí tap mù, Yesuq shuq râ matú yhun byî ri.

49 Góbang gi, "Yhang lé, Eliyaq, lé hkyi yu lhê laq, nga-nhúng chôm láng wú sháng." ga taî akô nghut ri.

50 Haú hkûn, Yesuq gi, htê mó èq dum garû kat luí, Yhâng é soqkâng byit bê nghut ri.

51 Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri.

52 Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô.

53 Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang ê luí, byù myo myô hí má htoq shit akô nghut ri.

54 Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô

✨ 27:46 Hkya-on 22:1 * 27:53 Chyoiyúng myuq gâ é gi, Yerusalem wà mó lé gâ é nghut lhê.

banshoq lé myàng kôjáng, gyuq dàn kômù, "Yhang gi, gè gè yhang, Garai Gasàng é Yhangzo nghut ri-nhung!" ga tai akô nghut ri.

⁵⁵ Myiwe wuì myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô.

⁵⁶ Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri.

⁵⁸ Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri.

⁵⁹ Yosep gi, gungsôm lé yù mù, pán yúng eq htup yup luì,

⁶⁰ luqgok lé kyûng tô é, yhâng é lup sik hkaû má ê kat tô ri. Hau htâng, yhang gi, luphkum má, luqlông eq lhêng chí pyâm to luì, ló byuq bê nghut ri.

⁶¹ Magadalaq wà mâ é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Haù Hên Lajang Buinyi lai é htâng nyí lé, hkyangjong agyi pé eq Hparishe pé gi, Pilat chyáng ê mù,

⁶³ "Yhumsîng ê, Yhang, asak dui nyi ashî hkûn, 'Sum nyí nghû râ buinyì má, Ngò dum dui toq lô râ.' ga, haú byù mhaú taí é dang lé, ngamoq bûn nyi lhê.

⁶⁴ Haú mù, haú sum nyí nghû râ buinyì jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaú yu ló mù, Yhang shi é mai dum dui toq lô bê ga, byu pé lé taí kó râ nghut lhê. Shî, ló htâng dàm mhaú é hkyô gi, sâng-hi dàm htoq je wui râ nghut lhê." ga, lé taí akô nghut ri.

⁶⁵ Haú hkûn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tû taí kat ri.

⁶⁶ Haú mù, yhangmoq gi, ê luí, lup lé gau shoq ga, luqgok má dizik htung mù, lup zúng byû nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyì lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má ê wú râ ga, e ló akô.

² Haú hkûn, layàng mó nún lo ri; hkâsu mù gà le, Yhumsîng Garaí é maumang lagyo rayuq gi, mauhkûng mai gyó lé lô mù, lup má ê luí, haú luqlong lé tu lheng mù, hau ahtoq má zung tô ri.

³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri.

⁴ Zúng nyi é bang gi, yhang lé lûm wú gyuq kômù, pyik pyik nán luî, shî gùng su dut bùm bekô nghut ri.

⁵ Haû maumang lagyo gi, myiwe haú nhik lé, "Hkâgyuq kó! Haû tapzîng má jén sat huî é Yesuq lé, nungnhik ho nyi kô é lé, ngò sê lhê.

⁶ Yhang gi, shí má a nyi lo; Yhang taî tô é eq rajung za, lhoq dui toq é hui bê nghut ri. Yhang lé lheq é jowò lé, lé wú keq.

⁷ Haû mù, hân taû lô luî, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut lô láng berâ. Nungmoq, Yhang lé, haú má lô myâng kó râ nghut lhê.' nghû lô taî kyo keq. Nungnhik lé, ngò taî é lé matsîng chûng keq." ga taî kat ri.

⁸ Haû mù luî, myiwe myhí haú nhik gi, gyuq kôlhang, gyai gabú é myit èq lup mai hân taû lô mù, Yhâng é chángzô pé lé lô taî kyo râ matú, din lô bê nghut ri.

⁹ Haú hkûn, Yesuq gi, radá dâm yhangnhik lé lhom tê mù, "Wángzán nyi kó sháng gaq." ga taî ri. Haû mù, yhangnhik gi, huî ê luî, Yhâng é hkyî má po zing to mù, Yhang lé noqkuq akô.

¹⁰ Haú hkûn, Yesuq gi, yhangnhik lé, "Hkâgyuq kó. Ngá é gumang wuî lé, Galile mau shut e lô keq nghû lô taî kyo keq; haú má, yhangmoq, Ngo lé myàng kó râ nghut lhê." ga taî kat ri.

Zúng Nyi É Gyezô Pé Taî É Danglù

¹¹ Myiwe haú nhik hkyô má ru nghut nyi ashî le, lup zúng é gyezô pé ra-am gi, myuq hkaû má wang lô mù, dut lai lo é hkyô banshoq lé, haû hkyangjong agyi pé lé lô taî kyo akô nghut ri.

12 Haû hkyangjong agyi pé gi, suwún wuî eq huî lhum luî, hpyê lhûm é htâng má, haû gyezô pé lé, ngùn myo myo tsup byi mù,

13 "'Myín lé, ngamoq yhup myhî tô é hkûn, Yhâng é chángzô pé lé lô mù, mâng lé, lé hkaû yu ló bekô nghut ri.' nghû taí keq.

14 Shí hkyô lé, haû mauzau hpó wó gyô é nghut jáng, yhang myit ngón shoq, ngamoq taí râ nghut lhê; haú hkûn, nungmoq gi, hai manghkáng a htoq râ nghut lhê." ga taí kat ri.

15 Haû mù, gyezô pé gi, ngùn haú pé lé yù luî, yhangmoq lé taí kat é eq rajung za kut bekô nghut ri. Haû su mù, haú hkyô gi, Yudaq byu pé má taí pyo myhîn ló bê nghut mù, ahkuî jé shoq taí nyi bum akô nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

16 Hau htâng má, haû chángzo raxe rayuq gi, yhangmoq lé, Yesuq ê nhang tô é Galile mau má é bùm shut e ló bekô nghut ri.

17 Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jing kó nghut ri.

18 Hau htâng, Yesuq gi, yhangmoq chyáng lé lô mù, "Mauhking eq myigùng htoq mã é ahkáng ayá banshoq, Ngo lé byí to bê nghut lhê.

19 Haû mù, nungmoq gi, htoq ê luî, byù myû chângjup lé, Ngá é chángzô pé dut nhâng mù, haû Íwa, Yhangzo, Choyiyúng Woi-nyí é myìng lang luî, wui-myhup hkám byi mù,

20 nungmoq lé, Ngò hkunmó hkyô tô é lhunglhang lé châng kut râ matú, yhangmoq lé

mhoqshit keq. Ngò gi, mingkan pyat htûm é hkûn
jé shoq lháng, nungmoq eq rahá ru nghut nyî râ
nghut lhê." ga pying tô ri.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

23f9fc55-a8a4-59ef-9513-707ec336b0ee